

# Řexdayem n Imazanen

## *Lmasih itwassgaεεad yar ujenna*

**1**<sup>1</sup>Adlis amezwaru i uriy, a Tiyufilis, *uriy t x marra min ibda Yeccu* ad igg u ad isseřmed <sup>2</sup>ař ass i di immeksi *yar ujenna*, awarni řami iweřša s Arruř Iqeddsen imazanen i tuya ixđar netta, <sup>3</sup>inni umi, awarni řami tuya iweddeb, isscen asen εawed ixef nnes s wařtas n řeεřamat belli aqqa netta iddar, am t řrin arebein n wussan issawař x tmesřayin n tgeldit n Arebbi. <sup>4</sup>Am tuya imun akidsen, iweřša ten řima war d tteffyen ca zi Urcalim, maca ad qqimen ad rajan řwaεd n Tbatat “i tuya kenniw - am tuya inna netta - tettesřam zzayi. <sup>5</sup>Minzi Yuřanna tuya isseřđas s waman, maca kenniw ad twassyeđsem s Arruř Iqeddsen war ięi ařtas n wussan zeg wami.” <sup>6</sup>Xenni sseqsan t inni tuya din imunen, qqaren “A Sidi, ma di řweqt-a ad tarred tageldit i Israyil εawed?” <sup>7</sup>Inna asen “War d awem-d yusi ad taregbem zmanat d ikuden n řweqt i iřtef Tbatat di řřulřta nnes. <sup>8</sup>Maca kenniw ad teksim jjehd xmi xawem-d i ya ihwa Arruř Iqeddsen uca kenniw ad tiřim d řečhud di Urcalim, di marra Yahudiyya u di Samariya uca ař řtarf n ddunnit.” <sup>9</sup>Umi inna aya, immeksi am xezwaren nitni, uca aseynu iksi t x tiřřawin nsen. <sup>10</sup>Am d as sseđfaren s tiřřawin nsen řami iruř yar ujenna, xřar, aqqa bedden řarsen tnayen n yeryazen arđen arruđ d acemřař, <sup>11</sup>nnan asen “A iryazen zi Ljalil, min kenniw ideewen tettbeddam txeřřarem yar ujenna? Aqqa Yeccu wanita immeksi xawem yar ujenna, xenni ad d iεeqeb amecnaw mammec t teřrim iruř yar ujenna!”

## *Řixđaret n Mattiya deg wemcan n Yahuda*

<sup>12</sup>Xenni εeqben yar Urcalim zeg wedrar umi qqaren adrar n Zziton i ięan zzat i Urcalim uca iggwej xas mřir ticti n ij n usafar n sseb (=εřahař *ijj n kilumiter*). <sup>13</sup>Umi d udfen, gaεeden yar tyurfet sennej mani tuya ttyiman Buřrus d Yuřanna d Yaεqub d Andrawus d Filibbus d Tuma d Bartulumiyu d Matta d Yaεqub mmis n Alfiyu d Simean umi qqaren ‘Bu-čđaret’ d Yahuda mmis n Yaεqub. <sup>14</sup>Ina marra idsen tuya řbaren s ij n dmam x tzaęitin u x tkessit n

řmeeruf ak-d temyarin u ak-d Maryem yemmas n Yeccu d aytmas. <sup>15</sup>Deg wussan nni ikkar Buřrus di řweřt n aytmas - tuya din ij n řyaci dayes eřařař meyya u eicrin n ismawen - inna <sup>16</sup>“A iryazen tawmat, tuya ittxeřř ad itwakemmeř *awař* n wedlis i itwannan qbeř s Arruř Iqeddsen s uqemmmum n Dawud x Yahuda wenni idewřen d amgewwad n yinni iřebbsen Yeccu, <sup>17</sup>minzi netta tuya itwahseb zzayney u tuya iřtef tasyart di tsexxart-a. <sup>18</sup>Aqqa wa tuya ikesseb ij n iyyar s řmunet n řyecc uca umi iwđa x uyembub nnes, aqqa ifeřeę zi řweřt uca marra ađan nnes ffyen-d ęar barra. <sup>19</sup>Aqqa man aya idweř itwassen ęar marra imezdaę n Urcalim ařami semman iyyar nni deg iřes nsen ‘Ĥaql dama’ min ixs ad yini ‘iyyar n idammen’.  
<sup>20</sup>Minzi tura deg wedlis n isebbiřen

*‘Ad tedweř taddart nnes d řxarbet, uřa d ijj war dayes izeddeę!*

*Ad iki wenneđni řxedmet nnes n umehđayi.” Sbh. 69:25, 109:8*

<sup>21</sup>X uyenni ittxeřř belli, zeg yeryazen inni tuya d imeacaren akidney kuř řweqt i di tuya Sidi Yeccu ittadef u itteffey jaraney <sup>22</sup>zeg useęđař n Yuřanna ęar wass i di immeksi xaney, aqqa ijjen zzaysen ad idweř d acehhad akidney x tnukra nnes. <sup>23</sup>Uca arecčřen tnayen: Yusef, umi qqaren Barsabas wenni umi ttkenan eawed Yustus, d Mattiya. <sup>24</sup>Xenni zzuęen, nnan “A Sidi, cek tessned uřawen n marra *iwdan*, sscen *aney* man wen zi tnayen-a i tixđared, <sup>25</sup>řima ad icarc di tasexxart-a u di tazant (=řxedmet n umazan) i di ismeř Yahuda řima ad irař ęar wemcan nnes.” <sup>26</sup>Xenni ggin akeccuđ uca yusi-d ukeccuđ x Mattiya uca arnin t ęar řideac n imazanen.

### **Tawasit n Arruř Iqeddsen**

**2** <sup>1</sup>Umi d yiweđ wass n ‘řeid n xemsin’, tuya-ten marra jmię deg ijj n wemcan s dmam d ijjen. <sup>2</sup>Řexdenni deg ijj n umur yusi-d ij n zzhir zeg ujenna, igga axmi d asemmiđ n ict n třaryat ijehden ařtas, iccur marra taddart mani tuya qqimen <sup>3</sup>uca đřaren asen-d iřsawen n tmessi itteđduduęen ittemsebđan, arsin x kuř ijjen zzaysen <sup>4</sup>u marra nitni dewřen ccuren s Arruř Iqeddsen, bđan ad ssiwřen s iřsawen nneđni am mammec d asen iwca Arruř ad zzaysen neřęen.  
<sup>5</sup>Di Urcalim tuya zedęen Wudayen, iryazen inni ittweęqaren

Arebbi, zi marra řegnus inni iġan sadu ujenna. <sup>6</sup>Umi ikkar zzhir-a, imun řyaci uca ittebhet, minzi kuř ij tuya ittesřa asen ssawařen s yiřes nnes. <sup>7</sup>Dehcen ttebhten marra, nnan jarasen “Ma war ġin marra ina inni i din issawařen d Ijaliliyyen? <sup>8</sup>Mammec d asen nesřa neccin, kuř ij zżayney s yiřes nnes i zi d netwaxřeq: <sup>9</sup>Ibartiyyen d Imidiyyen d Ilamiyyen d imezday n Misubutamiya d Yahudiyya d Qabadukiya d Bunřus d Asiya <sup>10</sup>d Frixiya d Bamfiliya d Miřra d marra jwayeh n Libiya řar Qayrawan uřa d Irumaniyyen i da izeddyen, ammu inni d Udayen am inni idewřen d imeacaren n Wudayen, <sup>11</sup>uřa d Ikritiyyen d Waeraben, aqqa neccin nesřa asen ssawařen s yiřes nney x řexdayem timeqqrarin n Arebbi!” <sup>12</sup>Marra ttebhten uca iweddar asen ckun, qqaren ij i wenneđni “Min ixs ad yini man aya?” <sup>13</sup>Inneđni maca sthezzen, nnan “Nitni ccuren s binu amiřid.”

### **Butrus ittheddēt řyaci**

<sup>14</sup>Maca Butrus ikkar ak-d ĥideac uca issgaeeed tmijja nnes, inna “Kenniw, a iryazen d Udayen u marra imezday n Urcalim, ittxeř ad yiři itwassen man aya jarawem, wcem amezzuř i wawařen inu. <sup>15</sup>Minzi iwdan-a war scaren ca am mammec d awem ittyiř, minzi aqqa-tt d tasaeeet d třata n wass. <sup>16</sup>Maca aya min itwannan zeg umkacaf Yuwil

*<sup>17</sup>Arebbi iqqar, ad yiři deg wussan ineggura,  
aqqa ad faryey zi Arruř inu x marra iwdan,  
ad kacfen iřenjiren d thenjirin nwem  
uca ibřiyen nwem ad xasen-d idar řewři  
uca iwessura nwem ad arjan tirja.*

*<sup>18</sup>Uřa x isemyan inu u x tiyya inu  
ad faryey zi Arruř inu deg wussan nni uca ad kacfen.*

*<sup>19</sup>Ad wcey lmuējizat deg ujenna sennej  
uřa d řeeřamat x tmurt swadday:  
idammen d tmesi d řefwar n ddexxan.*

*<sup>20</sup>Ad tedweř tfuct řar taġest d tziri řar idammen  
qbeř i d řa yas wass imřaren ieuġen n Arebbi  
uca marra wi i řa iřayan s isem n Arebbi  
ad injem.’* Juw. 2:28-32

<sup>22</sup>A iryazen n Israyil, sřem awařen-a, Yeccu Nnařiri, aqqa-t d bnađem i d awem itwasscanen zi Arebbi s řeejaye b d lmuzejizat d řeeřamat i yegga Arebbi s ufu s nnes di řwestř nwem am mammec tessnem kenniw eawed. <sup>23</sup>D wa, wenni i din itwasellmen ełahřab řxađar n Arebbi ieewwřen d tmusna nnes qbeř, aqqa tiwymem t u tsemmarem t x řřalib s ifassen n lkuffar uca tenřim t, <sup>24</sup>aqqa d wenni issnekkar it-id Arebbi am issbeeeed řewjae n řmewt umi war tuyi izemmar ad zzayas itwařtef netta. <sup>25</sup>Minzi Dawud inna xas ‘Tuya ttwařiy Sidi zzati di kuř amur, aqqa-t x yeffus inu řima war ttmeyyiřey. <sup>26</sup>X uyenni ifarř uř inu uca iřes inu isřiwřiw, wah, uřa d aysum inu ad tareyyeř s usitem, <sup>27</sup>minzi war tettejjid řeemar inu di řaxart uřa war tettejjid Amqeddas nnek ad ikiccu. <sup>28</sup>Cek tessecned ayi ibriden n tudart, cek teccured ayi s řefrařet s uyembub nnek.’

<sup>29</sup>A iryazen tawmat, aqqa teedeř ayi ad awem ssiwřey s břayřay x jedditney Dawud belli aqqa immut, itwanděř uca anděř nnes aqqa-t yarne y ař ass-a. <sup>30</sup>Umi netta tuya d amkacaf, issen belli Arebbi ijuř as s ict n tjařit belli ad as igg - zi řyiřet n teeddist tamezyant nnes - Lmasiř ełahřab aysum uca ad t issyim x řkursi n řearc nnes, <sup>31</sup>x uyenni tuya netta izwar izra u issiweř x tnukra n Lmasiř belli řeemar nnes war itwasseedu ca yar řaxart uřa d aysum nnes war ittkicca. <sup>32</sup>Yeccu wanita aqqa issnekkar it-id Arebbi u neccin marra d řechud x man aya. <sup>33</sup>Umi itwassgaeed netta s yeffus afusi n Arebbi, iřtef řwaed n Arruř Iqeddsen zi Tbatat, aqqa ifarrey it xenni am mammec tettwařam u tettesřam řexxu. <sup>34</sup>Minzi Dawud war igaeed ca yar ijenwan, maca netta simant nnes iqqař ‘Inna Sidi i Sidi inu ‘Qqim x yeffus inu, <sup>35</sup>ař i d ya ggey řeedyan nnek d tanebdat sadu iđaren nnek.’ <sup>36</sup>S tidett ad tessen marra taddart n Israyil nican, belli Arebbi igg it d Sidi d Lmasiř, Yeccu wanita, wenni tshellbem kenniw.”

<sup>37</sup>Řami sřin man aya, tudef asen deg wuř nsen daxeř, nnan i Buřrus u i imazanen inneđni “Min i ya negg, a iryazen tawmat?” <sup>38</sup>Inna asen Buřrus “Tubem, ejj kuř ijjen zwaywem ad itwasseydeř s yisem n Yeccu Lmasiř i weyřar n ddnub uca ad tqebřem tamewci n Arruř Iqeddsen. <sup>39</sup>Minzi řwaed i kenniw u i tarwa nwem u i marra inni iřan yar řaggwaj, marra inni x i d ya iřaya Sidi Arebbi nney.” <sup>40</sup>Uca s wawařen nneđni ařtas tuya isseqnee u ieřem asen, iqqař “Jjem kenniw ad tnejmem zi tařiřet-a ieewwjen.” <sup>41</sup>Inni iqebřen

awař nnes s řefrahet twassyedšen uca ttmarnin-d deg wass nni eřařař teřt ařaf n řeemur.

### *Amuni n řmumenin*

<sup>42</sup>Nitni qqimen řbaren di tyuri n imazanen d tmunt d tarezzit n weyrum u di tzařitin. <sup>43</sup>Tudef tiggwudi di kuř řeemar uca msarent lmuejjizat d řeřamat ařtas s *ifassen* n imazanen. <sup>44</sup>Marra inni yumnen tuya-ten jmie, tuya řarsen kuřci icarc. <sup>45</sup>Tuya zznuzan agra d řeeweč nsen uca beřtan man aya x marra eľařsab min iřđaj kuř ijj. <sup>46</sup>Tuya ttmunen kuř ass di taddart iqeddsen s dmam d ijjen, ttarezzan ayrum di tudrin, ttetten jmie s řefrahet u s wuř iřřa, <sup>47</sup>ssemyaran di Arebbi u tuya ttetwasseizzen řar marra iwdan. Kuř ass tuya Sidi yarenni řar tmesmunt inni ittnejmen.

### *Asgenfi n ij n weryaz d aneđbař*

**3** <sup>1</sup>Buřrus d Yuřanna jmie gaeeđen řar taddart iqeddsen di tsaeet n tzařit tenni d wiss tesa (=tasaeet tuya-tt d řta awarni đđhur). <sup>2</sup>Tuya din ij n weryaz d aneđbař zeg uaeđdis n yemmas, arbun t uca ssyiman t kuř ass řar tewwart n taddart iqeddsen umi qqaren ‘tawwart tařebřant’ řima ad ittar řředqet zeg inni ittadfen řar taddart iqeddsen. <sup>3</sup>Aqqa wa, umi izra belli Buřrus d Yuřanna xsen ad adfen řar taddart iqeddsen, ittar zzaysen řředqet. <sup>4</sup>Inđar dayes tiřřawin nnes Buřrus ak-d Yuřanna, inna as “Xřar dayney.” <sup>5</sup>Netta iqee daysen, ittraja ad zzaysen iřřef ca. <sup>6</sup>Inna as Buřrus “Nnuqart d wurey war řari řin, maca min řari d man aya i d ac wciy s yisem n Yeccu Lmasiř Nnařiri! Kkar, tuyured!” <sup>7</sup>Iřřef it zeg uřus nnes ařusi uca issnekkar it. Řexdenni menēen iđaren nnes d ticeebin nnes, <sup>8</sup>ingez uca ibedd x iđaren, iggur uca yudef akidsen řar taddart iqeddsen, iggur, ineggez, issemyara di Arebbi.

<sup>9</sup>Marra iwdan řrin t iggur issemyara di Arebbi, <sup>10</sup>ssnen aqqa netta d wenni tuya ittyiman ittettar řar ‘tewwart tařebřant’ n taddart iqeddsen uca nitni dewřen ccuren s wedhac d utebhet x min d as imsaren. <sup>11</sup>Am tuya aryaz aneđbař, wenni tuya itwassgenfan, icebbar di Buřrus d Yuřanna, xenni dduqqzen xasen marra iwdan di řemrař umi qqaren akulwar s ibilaren n Sulayman, ttbehten.

***Buṭrus ittbarreḥ s Lmasiḥ***

<sup>12</sup>Umi izra Buṭrus aya, yarr-d x weydud “A iryazen n Israyil, min kenniw ideewen tettbehtem s uya? Mayemmi dayney tejearem axmi s jjehd nney niy s uweqqar nney n tcuni narr it iggur?” <sup>13</sup>Arebbi n Ibrahim d Ishaq d Yaequb, Arebbi n řejdud nney, aqqa isseuḡa aḥenjir amsexxar nnes Yeccu wenni tsellmem u tenkarem arendad n Bilatuš wenni tuya iḥekkem belli icuwwar ad as arxun. <sup>14</sup>Maca kenniw aqqa tenkarem Amqeddas Amseggad, tzawgem ad awem immewc weryaz aqettař. <sup>15</sup>uca tenyim amgewwad n tudart, wenni d issnekkar Arebbi zeg imettinen, aqqa neccin d řechud x man aya. <sup>16</sup>S liman deg isem nnes, isem nnes aqqa issejhed wa wenni tettwařam, tessnem t, u liman i zzayes d ikkin aqqa iwc as agenfi ikmeř ztatwem marra. <sup>17</sup>Řexxu, a awmaten, necc ssney, aqqa kenniw teggim man aya am tjeřem, amenni ggin eawed imeqqranen nwem. <sup>18</sup>Maca Arebbi aqqa ikemmeř ammu min tuya issizwar ixebbar xas s uqemmum n marra imkacafen belli Lmasiḥ iggur ad iweddeb. <sup>19</sup>X uyenni tubem, t̄eqbem yar *webrid* ĥima ad awem itwamseḡ ddnub nwem uca xenni ad d asen wussan n ufewwej zi jjihet n Arebbi <sup>20</sup>uca ad issekk Yeccu Lmasiḥ wenni tuya itwabarreḥ zzayes qbeř i kenniw. <sup>21</sup>Aqqa ittxeřš as i ujenna ad iqbeř wanita ař ussan n weedař n marra timesřayin mixef tuya issawař Arebbi s uqemmum n marra imkacafen nnes iqeddsen zi zman. <sup>22</sup>Aqqa Musa inna i řejdud

*‘Sidi, Arebbi nwem, ad awem-d issnekkar  
ij n umkacaf amecnaw necc zeg wawmatwem.*

*I netta umi i ya tesřem  
di marra mixef d awem i ya issiweř.’*    *Tiř. 18:15, 19*

<sup>23</sup>Ad yiři belli kuř řeemar i war isřin yar umkacaf-a ad itwasshellek zeg weydud. <sup>24</sup>Marra imkacafen zi Samwil d marra inni it-id ixerfen, meḥař tuya ssiwiřen, aqqa nitni izwaren barrḥen s wussan-a eawed. <sup>25</sup>Kenniw d tarwa n imkacafen u n řeahd i igga Arebbi ak-d řejdud nwem řami tuya iqqar i Ibrahim

*‘S zzariet nnek ad twabarkent marra tiqebbař n tmurt.’*

*Amz. 12:3, 18:18, 22:18, 26:4, 28:14; Gal. 3:8*

<sup>26</sup>Ařami d issnekkar Arebbi ařenjir *amsexxar* nnes Yeccu, issekk it-id ęarwem *i kenniw* imezwura mařenđ ad awem ibarek umi d yarra kuř ijjen zzaywem ad iwc s weurur i řęar nnes.”

***Buřrus d Yuřanna zzat i lmeřkama tameqqrant n Wudayen***

**4** <sup>1</sup>Am tuęa ssawařen ak-d iwdan, xeccen-d xasen ikehhanen ak-d umeqqran x taddart iqeddsen d Iřaduęiyyen, <sup>2</sup>tuęa xeyyęen minzi nitni tuęa sseřmaden iwdan u ttředdeten s tnukra n Yeccu zeg imettinen. <sup>3</sup>Uca ssarsen xasen ifassen uca řebbsen ten ař tiwecca nnes minzi tuęa tewđa-d tmeddit. <sup>4</sup>Ařęas zeg inni iřin awař-a umnen u řęedd n yeryazen yiweđ-d eřařař xemsa ařaf. <sup>5</sup>Di tiwecca nnes imsar belli imeqqranen nsen d imęaren nsen d imseřmaden nsen n idlisen munen di Urcalim <sup>6</sup>ak-d Hannan, azeęif n ikehhanen, d Qayafa d Yuřanna d Aliksandir d marra inni tuęa d iqqarřen zi řaę n uzeęif n ikehhanen. <sup>7</sup>Umi ten ssbedden di řwest, sseęsan ten “S man jjeđd nię s man isem i teggim aya?” <sup>8</sup>Řexdenni inna asen Buřrus iccuren s Arruř Iqeddsen, “A imeqqranen n weydud d imęaren n Israyil! <sup>9</sup>Mařa ass-a tesseęsam aneę x řxar i itwaggen i ij n umehřuc u s min zi idweř iggenfa, <sup>10</sup>ittxeřę ad tessnem marra kenniw d marra aydud (=cceb) n Israyil belli wanita ibedd zzatwem iřeřę s isem n Yeccu Lmasiř Nnařiri, wenni tšellbem d wenni d issnekkar Arebbi zeg imettinen, aqqa zzayes i imsar man aya. <sup>11</sup>D wa d ařru i itwasseřqaren zzaywem, a ibennayen, aqqa d wenni idewřen d azeęif n teęmart. <sup>12</sup>Asenjem war ięi s ijjen nneđni minzi war din isem nneđni sadu uęenna i immewcen i iwdan řima ad zzayes nenjem.” <sup>13</sup>Ařami řrin taryast n Buřrus d Yuřanna uca ufin belli nitni d iwdan iřafiyyen d iqubbaniyyen, aqqa ttbehten uca eęęřen belli nitni tuęa-ten ak-d Yeccu. <sup>14</sup>Uca umi řrin bnađem i tuęa iggenfan ibedd akisen, war ufin min i řa inin x man aya. <sup>15</sup>U awarni řami ten umaren ad ffęen barra i lmeřkama tameqqrant n Wudayen, mcawaren ak-d wayawya, <sup>16</sup>nnan “Min i řa negg s iwdan-a? Minzi aqqa iban-d mliř i marra imezđay n Urcalim belli řeęřamet temsar s ufus nsen, war nzemmar ad tt nenkar. <sup>17</sup>Maca řima war itwabarreř ktar jar weydud, ad ten nessiggwed řima war ttęimin ad ssiwřen uřa ak-d ijj n bnađem di třeę n isem-a.” <sup>18</sup>Awarni řami xasen-d řayan, weřęan ten mařenđ war ssiwřen war

sseřmaden ɛemmarš ɛad di ʧtweɛ n isem n Yeccu.<sup>19</sup> Maca Buṭrus d Yuḥanna arrin-d xasen, nnan “Ḥekmem kenniw, ma iḥiqq zi jjihet n Arebbi maḥend ad nseř ktar i kenniw x Arebbi,<sup>20</sup> minzi war nzemmar ad neqqim war nessiwř x min nezra u x min nesřa.”<sup>21</sup> Maca nitni ssggwden ten ɛad ktar, xenni jjin ten ad raḥen, ařmi war ufin min zi ten i ɣa ɛaqben zi ssibbet n iwdan. Minzi marra nitni tuya ssemyaran di Arebbi x min imsaren,<sup>22</sup> minzi bna dem i dayes itwagg řeɛramet-a n ugenfi tuya ɣares ktar zi arebein iseggwusa.

### **Tazağit n řmumenin**

<sup>23</sup>Awarni řami d asen arxun, ruḥen nitni ɣar inni iğan nsen uca xebbaren ten s marra min d asen nnan arruyas n ikehhanen d imyaren n weydud.<sup>24</sup> Umi sřin aya, ssgaɛeden tmijja nsen ɣar Arebbi s dmam d ijjen, nnan “A Sidi n marra, cek d wenni iggin ajenna d tmurt d řebḥar d marra min dayes,<sup>25</sup> cek d wenni innan s uqemmum n uḥenjir amsexxar nnek Dawud

‘Mayemmi ɣewwyen řegnus u mayemmi xarršen iwdan di min ixwan?

<sup>26</sup>Aqqa kkaren ijeğiden n ddunnit jmie uca imeqqranen munen  
đidd n Sidi uřa đidd n Lmasiḥ nnes.’ *Sbh.* 2:1,2

<sup>27</sup>Minzi s tidett aqqa Hirudus d Buntıyus Bilaṭus d řegnus d weydud n Israyil munen x uḥenjir amsexxar amqeddas nnek Yeccu wenni umi tmeřed<sup>28</sup> ĥima ad ggen marra min tuya izwar ineyyec ufu s nnek d cwar nnek ad yiři.<sup>29</sup> Řexxu, a Sidi, xzar ɣar usiggwed nsen uca ewc i isemyan nnek ĥima ad ssiwřen s wawař nnek s marra taryast<sup>30</sup> am tesswizzded afus nnek i usgenfi u ĥima ad msarent řeɛramat d lmuɛjizat s yisem n aḥenjir amsexxar nnek amqeddas Yeccu.”<sup>31</sup> Awarni řami kemmřen tazağit, inhezz wemcan i di tuya munen u marra dewřen ccuren s Arruḥ Iqeddsen, ssawařen s wawař n Arebbi s teryast.

### **Tamesmunt tamezwarut n Lmasiḥ**

<sup>32</sup>Řyaci n inni yumnen tuya s wuř d řeɛmar d ijjen uca uřa d ijj war iqqar belli min tuya ɣares aqqa i netta weḥdes waha, maca nitni carcen di kuřci jarasen.<sup>33</sup> Tuya imazanen cehhden s ij n jjeḥd imyax n tukra n Sidi Yeccu uca tiweđ-d nniemet temyax n marra nitni,<sup>34</sup> uca war tuya

jarasen uřa d ijj dayes řexšeš, minzi marra inni ħar iġa iyyaren niy tudrin zznuzan ten uca ttawyen-d ttaman n min zznuzan, <sup>35</sup>ssrusan t ħar iđaren n imazanen uca bđan i kuř ijj elahsab min tuġa iħwaj. <sup>36</sup>Yusis wenni umi řayan imazanen Barnabas, min ixs ad yini ‘mmis n usfewwej’, netta zi teqbič n Lawi, ixreq di Qubrus, <sup>37</sup>tuġa ħares ij n iyyar, izzenz it uca yiwi-d tmenyat, issars itent ħar iđaren n imazanen.

### **Řħukm x Ananias d Saffira**

**5** <sup>1</sup>Ij n weryaz qqaren as Ananias d temġart nnes Saffira zzenzen ca zeg wagra nsen. <sup>2</sup>Netta iksi i yixef nnes zi tmenyat n ttaman n wagra, am tessen temġart nnes, uca yiwi-d ict n tesġart zzayes, issars itt ħar iđaren n imazanen. <sup>3</sup>Inna as Buřrus “A Ananias, mayemmi iccur Cciřan uř nnek ħima ad tessxarqed x Arruħ Iqeddsen u ħima ad teksid i yixef nekk zi tmenyat n iyyar? <sup>4</sup>Maelik war tezzenzed iyyar, ma war ittiři ead nnek, xenni ead umi t tezzenzed, ma war tuġi ttaman nnes ead deg ufus nnek? Min cek ideewen tettegged deg wuř nnek man aya? Aqqa cek war tessxarqed ca x iwdan maca x Arebbi.” <sup>5</sup>Umi isřa Ananias awař-a iwđa di tmurt, iffeġ as buħbeř uca tedweř tiggwudi temġar x marra inni isřin x man aya. <sup>6</sup>Kkaren ibřiġen, cefnen t uca ksin t ħar barra, neđřen t. <sup>7</sup>Xenni, umi edunt eřahař třata n tsaeetin, tudef-d temġart nnes, war tessin min imsaren. <sup>8</sup>Yarr-d xas Buřrus “Ini ayi, ma aqqa tezzenzem iyyar s wanect uya?” Tenna as “Wah, s wanect uya.” <sup>9</sup>Inna as Buřrus “Min kenniw ideewen tettafqem jarawem maħend ad tjarrbem Arruħ n Arebbi? Xzar, aqqa iđaren n yinni ineqřen aryaz nnem ħar tewwart, ad cem ksin barra eawed.” <sup>10</sup>Řexdenni tewđa ħar iđaren nnes uca temmut, udfen-d ibřiġen nni, ufin tt temmut, ksin tt ħar barra uca neđřen tt zzat i weryaz nnes <sup>11</sup>Tedweř tiggwudi temġar ħar marra tamesmunt d ħar marra inni isřin man aya.

### **Řeeřamat d lmuęjizat s ifassen n imazanen**

<sup>12</sup>Msarent wařtas n řeeřamat d lmuęjizat jar iwdan s ifassen n imazanen uca marra nitni tuġa munen s wuř d ijjen deg ukulwar n Sulayman ak-d ibilaren. <sup>13</sup>Maca zeg inni iqqimen war izeim ħed ad kisen igg azeġif, maca iwdan weqqaren ten ařtas. <sup>14</sup>Mmarniyen-d ktar ead ħar inni yumnen di Arebbi, ij n ubarru n yeryazen d temġarin, <sup>15</sup>ařami tuġa

kessin imehřac barra ęar zznaęi, ssrusan ten x qamat d teswit řima xmi i d ęa yas Buřrus balak ad tekk męyr tiři nnes x ij zżaysen.<sup>16</sup> Ineyru ęawed řęaci zi tneddam i d as-d innden i Urcalim, iwyen-d imehřac d inni itwamarren zi řaryah imengas uca marra gęenfan.

### *Afekki n Buřrus d Yuřanna zi řehbes*

<sup>17</sup>Ikkar uzeęif n ikehhanen d marra inni ięan akides, aqqa nitni zi tebridt n Iřaduęiyyen uca dewřen ccuren s řehsed,<sup>18</sup> ssarsen ifassen x imazanen, gęin ten di řehbes n řęens.<sup>19</sup> Maca ij n lmalak n Sidi yarzem tiwwura n řehbes s řiřet, issuffey iten ęar barra, inna<sup>20</sup> "Ruřem, xenni tbeddem di taddart iqeddsen, siwřem i weydud s marra awařen n tudart-a."<sup>21</sup> Awarni řami sřin aya, udfen ęar taddart iqeddsen ęar řřbeř, bdan sseřmaden. Maca řami d yusa uzeęif n ikehhanen d yinni akis ięan, xenni řayan nitni x lmeřkama tameqqrant *n Wudayen* u x marra imęaren n ayt n Israyil uca ssekken *ixeddamen nsen* ęar řehbes řima ad ten-d awyen.<sup>22</sup> Maca imxazniyyen umi d usin, war ten ufin ca di řehbes, ęeqben, xebbaren s man aya,<sup>23</sup> qqaren "Aqqa nufa řehbes ibelle ę mliř u i ęessasen bedden barra ęar tewwura maca umi narzem, war din nufi řed daxeř."<sup>24</sup> Řami isřa umeqqrant *n řeeskar* n taddart iqeddsen d arruyas n ikehhanen awařen-a, iweddar asen min i ęa gęen.<sup>25</sup> Uca yusi-d ijjen ixebbar iten, iqqar "Xřar, iryazen inni i teggim di řehbes, aqqa bedden di taddart iqeddsen, sseřmaden iwdan!"<sup>26</sup> Řexdenni iruř din řqebřan *n řeeskar* ak-d imxazniyyen, iwyen ten-d, maci s uęiř minzi tuęa gęweden zeg iwdan řima war zzayes ttetwaęejjaren.<sup>27</sup> Umi ten-d iwyen, sbedden ten zzat i lmeřkama tameqqrant *n Wudayen*. Isseęsa ten uzeęif n ikehhanen, iqqar<sup>28</sup> "Ma war kenniw nweřři mařend war tessęaram s yisem-a, xřar, aqqa kenniw teccurem Urcalim s tyuri nwem, kenniw texsem ad xaney tarrem idammen n bnađem-a."<sup>29</sup> Maca Buřrus d imazanen arrin-d, nnan "Ittxeřř řęaet i Arebbi ktar zi tenni n iwdan.<sup>30</sup> Arebbi n řejdud nney issnekkar-d Yeccu wenni tenęim kenniw, tuyrem t x tefrewt.<sup>31</sup> S ufus nnes afusi aqqa issęaęeed Arebbi wanita d amęewwad d amsenjem řima ad iwc ttubet d weęfar n dđub i Israyil.<sup>32</sup> Neccin d řechud x man aya uca uřa d Arruř Iqeddsen i yewca Arebbi i inni i d as iřęaean."<sup>33</sup> Řami sřin aya, haęen ařęas uca bdan ttemcawaren řima ad ten nęen.<sup>34</sup> Maca ij n Ufarisi qqaren as Gamaliyal, netta d

amseřmad n ttawrat, wenni tuya itwaweqqar zeg iwdan marra, ikkar-d di lmeħkama tameqqrant n *Wudayen*, yumur ħima ad nedhen imazanen ħar barra i cwayt n řweqt. <sup>35</sup>Inna asen “A iryazen n ayt n Israyil, xzarem mliħ min i ħa teggem s iwdan-a.” <sup>36</sup>Minzi qbeř ussan-a tuya ikkar Tuddas, inna aqqa netta d ca, řeřqen dayes eřaħař ca n arebea meyya n yeryazen, aqqa nyin t u marra inni tuya t iđeffaren, dewřen twazeĝeen, ikemmeř array nsen. <sup>37</sup>Awarni man aya ikkar Yahuda Ajalili deg wussan n uzemmem, indeh awarni as ij n ubarru n iwdan iyewwyen, maca uřa d wa itwahellek uca inni it-id iđfaren, dewřen twazeĝeen. <sup>38</sup>Řexxu ad awem iniř, ħdam ixef nwem zeg iwdan-a, jjem ten ad raħen, minzi mařa cwar-a niř řxedmet-a zeg iwdan, xenni ad iqda, <sup>39</sup>maca mařa tuya-t zi Arebbi, war tzemmarem ad t tarzem ħima kenniw war tetwafim d inni ittmenyan ak-d Arebbi eawed.” <sup>40</sup>Xenni ggin as array uca awarni řami d řayan x imazanen ħarsen, hettken ten s urekkuđ, eřmen asen ħima war ssiwiřen s isem n Yeccu, xenni arxun asen. <sup>41</sup>Nitni ruħen zi lmeħkama tameqqrant, farħen řami *ufin belli nitni* twaħesben ad sdaheĝen abehdeř di ttwee n yisem nnes. <sup>42</sup>Uca war sbedden ca ad sřemden kuř ass di taddart iqeddsen u di tudrin, barrħen s Yeccu Lmasiħ.

### **Řixđaret n sebea n yeryazen i tsexxart**

**6** <sup>1</sup>Řami tuya ktaren imeħđaren ařtas deg wussan nni, aqqa *Udayen* inni ħarsen řħard n Iyunaniyyen eksen Ieibraniyyen minzi tijař nsen farrđen daysent di tsexxart n zžad n kuř ass. <sup>2</sup>Teneac n *imazanen* řayan x ubarru n imeħđaren maħend ad munen, nnan “War ieddeř ad nsexxar ttwabeř i *macca* am netteĵja deg wawař n Arebbi. <sup>3</sup>Xzarem, a awmaten, xđarem sebea n yeryazen zzaywem inni ħar teĝa chadet tecna, ccuren s Arruħ Iqeddsen d tiyit, maħend ad ten nkellef s tmesřact-a. <sup>4</sup>Maca neccin ad neřbar di tzaĝit u di tsexxart n wawař.” <sup>5</sup>Ieĵeb wawař-a i marra řyaci uca nitni ixđaren Stifanus, ij n weryaz iccuren s liman d Arruħ Iqeddsen, xenni Filibbus d Bruxuru d Nikanur d Timun d Barminas d Nikulas ij n umeacar n *Wudayen* zi Antiyuxiya. <sup>6</sup>Sbedden ten qibač i imazanen uca nitni, awarni řami zzuĝen, ssarsen xasen ifassen nsen. <sup>7</sup>Tuya awař n Arebbi iggam d řqedd n imeħđaren di Urcalim tuya imeqqar ařtas uca ij n ubarru d ameqqran zeg ikehhanen idweř iřtae i liman.

### *Uđuf n Stifanus*

<sup>8</sup>Stifanus, am tuya iccur s liman d jjehd, tuya ittegg lmuzejizat d řeeřamat mřarent jar iwdan. <sup>9</sup>Maca ca n yinni iřan zeg usinagug qqaren as *asinagug* n 'iřurriyyen' u ca n Isiriniyyen (=inni iřan zi *Sirini niy Qayrawan*) u ca n Iliksandriyyen (=inni iřan zi *Aliksandriyu*) uřa d ca n inni iřan zi Kilikiya d Asiya, tuya ttqacařen Stifanus. <sup>10</sup>War zemmaren ad eksen tiyt d Arruř i zi tuya issawař. <sup>11</sup>Řexdenni earrnen iryazen mařend ad inin "Aqqa nesřa asen, ssawařen s wawařen iceqqfen di Musa u di Arebbi." <sup>12</sup>Aqqa ssyewwřen weydud d imyaren n *weydud* d imseřmaden n idlisen uca umi xas-d dduqqzen, řřfen t, nedhen t řar lmeřkama tameqqrant n Wudayen. <sup>13</sup>Ggin řechud issxarriqen, inni innan "Bnadem-a war issbeddi ad iceqqef deg wemcan-a iqeddsen u di ttawrat, <sup>14</sup>minzi nesřa as iqqar belli Yeccu Nnařiri wanita ad ihdem amcan-a, ad ibeddeř řřbaye i d aney iwca Musa." <sup>15</sup>Marra inni řar iřa řkursi di lmeřkama tameqqrant n Wudayen, umi d as řekkaren s tiřřawin nsen, řrin aymbub nnes amecnaw aymbub n ij n lmalak.

### *Stifanus itřheddet Udayen s Arruř Iqeddsen*

**7** <sup>1</sup>Azeřif n ikehhanen inna "Ma man aya d tidett?" <sup>2</sup>Netta inna "A kenniw, a iryazen, aytma d ibabaten, sřem. Arebbi n ueuři idřar i jedditney Ibrahim am tuya ead di Misubutamiya, qbeř mma ad izdey di řaran <sup>3</sup>uca netta inna as

*'Ffey zi tmurt nnek u zi řař nnek, as-d řar ict n tmurt  
tenni d ac i řa ssecney.'* Amz. 12:1

<sup>4</sup>Řexdenni iffey zi tmurt n Ikaldaniyyen uca izdey di řaran. Ssenni, awarni řami immut babas, *Arebbi* issmuři it-id řar tmurt-a i di tzeddyem řexxu. <sup>5</sup>Netta war d as iwci ca dayes řwart uřa d ijj n usurif n uđar, maca iwaed ad as tt iwc d agra i netta u i zzariet nnes awarni as, am war tuyi řares ead mmis. <sup>6</sup>Issiweř Arebbi ammu belli ad tiři zzariet nnes d inewjiwen deg ict n tmurt teyribt, ad ten arren d isemyan, ad daysen řezzan arebea meyya n iseggwusa. <sup>7</sup>Uca řgens i d as i řa yiřin d isemyan, ad t řasbey, inna Arebbi. Awarni man aya ad ffyen, ad ayi eebden deg wemcan-a. <sup>8</sup>Netta iwc as řeahd

n wextan. Ammu d iija Ishaq uca ixten it deg wass wiss tmenya uca Ishaq ijj-d Yaεqub, Yaεqub ijj-d tenεac n řejdud imezwura. <sup>9</sup>Řejdud imezwura ġarren zi Yusef uca zzenzen t di Miřra maca Arebbi tuya-t akis, <sup>10</sup>issenjem it zi marra řeřšarat nnes, iwc as nniemet d tiyit qibač i Firεun, ajeġid n Miřra wenni igg it d amqebbar x Miřra u x marra taddart nnes. <sup>11</sup>Xenni yusi-d řaz x marra tamurt n Miřra d Kanεan, ict n řeřšart temyar, war ufin řejdud nney min i ġa ccen. <sup>12</sup>Maca umi isřa Yaεqub belli aqqa din irden di Miřra, issekk řejdud nney din i umur amezwaru. <sup>13</sup>Deg umur wiss tnayen isseđhar Yusef ixef nnes i aytmas uca Firεun yargeb x řaġ n Yusef. <sup>14</sup>Issekk Yusef, yumur maħend ad d yas babas d marra řaġ nnes, xemsa u sebein n řεmur. <sup>15</sup>Ihwa-d Yaεqub ġar Miřra, immut netta d řejdud nney. <sup>16</sup>Iwyen ten ġar Cakim, ssarsen ten deg wenđeř wenni isya Ibrahim s ij n ttaman n nnuqart zi ayt n Ĥamur, babas n Cakim. <sup>17</sup>Maca ařami tuya teggur ad d tawed řweqt n řeahd i tuya iwaed zzayes Arebbi i Ibrahim, tuya iggam weydud uca idweř imyar di Miřra <sup>18</sup>ařami d yusa ujeġid nneđni tuya war issin Yusef. <sup>19</sup>Wanita tuya istenfæ zi řgens nney uca iyezza x řejdud nney, ittegg xasen bessif maħend ad nđaren iseyman nsen ġima war ttymimin ad ddaren. <sup>20</sup>Di řweqt nni ixřeq-d Musa, tuya dayes aźri imyar qibač Arebbi. Sseyment t di taddart n babas teřt n iyuren. <sup>21</sup>Řami itwammendār, teksi t d mmis yeġis n Firεun, tesseyem it d mmis i yixef nnes. <sup>22</sup>Itwassyar Musa di marra tiyit n Imiřriyyen uca tuya ittqedda x wawař u x min tuya ittegg. <sup>23</sup>Ařami ġares idweř arebein n iseggwusa, idar-d xas deg wuř nnes maħend ad yarzu aytmas n ayt n Israyil. <sup>24</sup>Umi izra ijjen *zeg aytmas* itwadřem, iřřar xas, intaqem wenni tuya itwadřemen uca inya Amiřri. <sup>25</sup>Ittyiř as, belli tawmat nnes ad fehmen aqqa Arebbi ad asen iwc asenjem s ufus nnes, maca nitni war fhimen. <sup>26</sup>Deg wass wiss tnayen idhar asen-d, řami tuya ttmenyan, iεřem asen maħend ad messeřraħen, iqqar “A iryazen, kenniw d awmaten, mayemmi teeddān ijjen x wennedni?” <sup>27</sup>Wenni tuya itteeddān x umqarreb nnes, iεarn it, inna

*‘Wi cek iggin xaney d řqadı?’*

<sup>28</sup>*Ma tixed ad ayi tenyed*

*am mammec tenyid idennađ Amiřri?’ Ufř. 2:14*

<sup>29</sup>Yarweř Musa di ssibbet n wawař-a uca idweř d anewjiw di tmurt n Midiyan mani d yejja tnayen iħenjiren. <sup>30</sup>Umi edun arebein n iseggwusa, iban as-d ij n lmalak n Arebbi di řexřa n wedrar n Sinayi di tmesi itteħduduęen di tabya. <sup>31</sup>Umi iřra Musa man aya, ittebhet s min iřra, iruħ din ħima ad yarzu x man aya, xenni tusi-d yares tmijja n Arebbi.

*<sup>32</sup>Necc d Arebbi n řejdud nnek Ibrahim,  
Arebbi n Iřaq u Arebbi n Yaęqub.’ Ufř. 3:6,15*

Ibda Musa ittarjiji ařtas, war izeim ad dayes ixřar. <sup>33</sup>Inna as Arebbi

*‘Kkes sandaliyat nnek zeg idaren nnek,  
minzi amcan mani tbedded d tamurt tqeddes.*

*<sup>34</sup>Aqqa zřiy ayezzi n weydud inu di Miřra uca sřiy i uzeħħar nsen,  
đarey-d ħima ad ten ssnejmey. Uca řexxu, as-d da,  
ad d cek ssekkey yar Miřra.’ Ufř. 3:5-10*

<sup>35</sup>Musa wanita, wenni nkaren nitni umi nnan ‘Wi cek iggin xaney d arrays d řqađi?’, wanita issekk it Arebbi d arrays d amsellek s ufus n lmalak wenni d as-d idħaren di tabya. <sup>36</sup>Wanita issuffey iten zi Miřra am igga lmuęjizat d řeřřamat di tmurt n Miřra u di řebħar azeggway u di řexřa řmijař n arebein n iseggwusa. <sup>37</sup>Wa d Musa wenni innan i ayt n Israyil

*‘Sidi Arebbi nwem ad awem-d yejj ij n umkacaf zi tawmat nwem,  
i netta umi i ya tesřam.’ Tiř. 18:15*

<sup>38</sup>Wanita tuya-t di tmesmunt n řgens di řexřa ak-d lmalak wenni tuya akis issawařen x wedrar n Sinayi uřa ak-d řejdud nney. Aqqa netta tuya itteřtef awařen iddaren ħima ad aney ten yewc. <sup>39</sup>Řejdud nney war xsen ad as řtaęen maca sstewwjen t xasen uca uřawen nsen eęqben yar Miřra. <sup>40</sup>Nnan i Harun

*‘Egg aney irebbiten inni d aney i ya izwaren minzi Musa wanita  
wenni i d aney igewwden zi tmurt n Miřra,  
war nessin min d as imsaren.’ Ufř. 32:1,23*

<sup>41</sup>Ggin ij n uyenduz deg wussan nni uca ssgaæden tayaršt i lašnam, farħen s min ggin ifassen nsen. <sup>42</sup>Arebbi iwca asen s weerur uca yarr iten ad eebden řeeskar n ujenna amecnaw mammec tuya tura deg wedlis n imkacafen

*‘Ma tiwyem ayi-d zeema tiyaršin d ššdaqi arebein n iseggwusa di řexřa, a taddart n Israyil?’*

<sup>43</sup>Iwa aqqa ead teksim aqiđun n Mulux d itri n arebbi nwem Rimfan u tšawar i teggim ħima ad tent tæbdem.

*Necc ad kenniw gewwdey ayirin qae i Babilun.’ Ams. 5:25-27*

<sup>44</sup>Aqiđun iqeddsen n chadet tuya-t ak-d řejdud nney di řexřa am mammec tuya yumur netta wenni innan i Musa maħend ad t igg x umedya i izra. <sup>45</sup>Řejdud nney eawed ksin t u nitni ak-d Yucuwa ssidfen t di min iğan yar řegnus, inni issuffey iten Arebbi qibač i uyembub n řejdud nney ař wussan n Dawud. <sup>46</sup>Wanita yufa nniemet yar Arebbi uca ittar as ad yaf ict n tzeddiyt i Arebbi n Yaequb. <sup>47</sup>Maca Sulayman d netta ibnan as taddart. <sup>48</sup>Maca wenni ieuđen x marra min iğan war izeddey di tudrin iqeddsen i itwaggen s ifassen am mammec iqqar umkacaf

<sup>49</sup>Ajenna d řearc inu u tmurt d tanebdat i iđaren inu.

*Man taddart i d ayi i ya tebnam, iqqar Sidi,  
u man amcan i iğan n arraħet inu?*

*<sup>50</sup>Ma war iggi ufus inu man aya marra?’ Ica. 66:1-2*

<sup>51</sup>A kenniw inni iqešen d inni war itwaxetnen s wuř d imezzuyen, řebda tettemeāram x Arruħ Iqeddsen amecnaw řejdud nwem ammu uřa d kenniw. <sup>52</sup>Man wen zeg imkacafen war t marrten řejdud nwem? Nitni nyin inni izwaren ttbarħen x twasit n Umseggad i zi d tdewřem kenniw řexxu d imyedđaren d iqettařen nnes, <sup>53</sup>kenniw inni iksin ttawrat s ufus n lmalakat maca war dayes tetřifem.”

### **Udayen ttħejjaren Stifanus**

<sup>54</sup>Umi sřin aya, itwaqešš wuř nsen, yežžen tiymas nsen řares. <sup>55</sup>Maca netta, am tuya iccur s Arruħ Iqeddsen, ikessi tiřawin nnes yar

ujenna, izra aeuġi n Arebbi d Yeccu ibedd ɣar yeffus n Arebbi. <sup>56</sup>Inna “Xzar, ttwařiy ijenwan arezmen d Mmis n bnadem ibedd ɣar yeffus n Arebbi.” <sup>57</sup>Maca nitni, am syuyyun s ict n tmijja d tameqqrant, qqnen imejjan nsen uca hejmen xas s dmam d ijjen. <sup>58</sup>Ssuffyen t barra i tendint, bdan ttħejjaren t u řechud kkessin arruđ nsen ɣar idaren n ij n ubřiy qqaren as Cawul. <sup>59</sup>Tuɣa ttħejjaren Stifanus am ittřaya, iqqar “A Sidi, tťef arruħ inu.” <sup>60</sup>Xenni iwđa x *ifadden nnes* uca isyuy s ict n tmijja tejhed “A Sidi war d asen ttħasab ddnub-a!” Awarni řami inna aya, immut.

### ***Cawul ittdarrec x tmesmunt n Lmasih***

**8** <sup>1</sup>Tuɣa Cawul yarđa x řmewt nnes. Deg wussan nni temsar ict n řehřart temɣar x tmesmunt di Urcalim u marra twazeġeen ɣar jwayeh n Yahudiyya d Samariya, myir imazanen. <sup>2</sup>Ca n yeryazen idiyaniyyen arbun Stifanus ɣar wendeř uca ggin xas ij n wecđan ameqqran. <sup>3</sup>Maca Cawul tuɣa ittareddeġ tamesmunt xmi ittadef ɣar tudrin, ittjarra iryazen d temɣarin uca ineddeh iten ɣar řehbes.

### ***Filibbus itbbeccar di tendint n Samariya***

<sup>4</sup>Inni itwazeġeen tuɣa gguren, ttenđden, ttbarrħen s wawař n řexbar asebħan. <sup>5</sup>Ihwa-d Filibbus ɣar tendint n Samariya, ibarreħ iten s Lmasih. <sup>6</sup>Tuɣa řyaci itťef di min itwannan zi Filibbus s wuř d ijjen am sřin u řrin řeřamat i igga. <sup>7</sup>Minzi zeg waťtas n yinni i di iġa řaryahat imengas ffyen zzaysen ina, syuyyun s tmijja tameqqrant uca aťtas n inedbařen d iqeđaħen twassgenfan. <sup>8</sup>Tuɣa din ict n řefraħet temɣar di tendint nni. <sup>9</sup>Aťtas zeg wami tuɣa din di tendint *nmi* ij n weryaz qqaren as Simean, tuɣa ittsehħar, issttebhet řgens n Samariya am iqqar x yixef nnes aqqa netta d ca. <sup>10</sup>Marra sřin ɣares s umezyan s umeqqran, nnan “Wanita d jjeħd imɣaren n Arebbi.” <sup>11</sup>Đfaren t s minzi netta tuɣa issarjef iten s ssħur nnes aťtas zeg wami. <sup>12</sup>Maca umi yumnen di Filibbus wenni tuɣa ittbarreħ s řexbar asebħan n tgeldit n Arebbi u s yisem n Yeccu Lmasih, xenni twassyedřen nitni, iryazen uřa d timɣarin. <sup>13</sup>Simean s yixef nnes eawed yumen u awarni řami itwasseyđeř, iqqim iđeffar Filibbus řebda, tuɣa ittebhet aťtas řami izra řeřjayeb d řeřamat imɣaren i imsaren. <sup>14</sup>Umi sřin imazanen inni iġan di

Urcalim belli Samariya teqbeř awař n Arebbi, ssekken ęarsen Buřrus d Yuřanna, <sup>15</sup>inni, umi d hwan ęarsen, zzuęen asen ģima ad řřfen Arruĥ Iqeddsen, <sup>16</sup>minzi netta tuęa ęad war d yusi x uřa d ijj zzaysen, tuęa twassęeđřen waha s yisem n Sidi Yeccu. <sup>17</sup>Xenni ssarsen xasen ifassen uca nitni řřfen Arruĥ Iqeddsen. <sup>18</sup>Umi iřra Simean belli s usarsi n ifassen n imazanen immewc asen Arruĥ Iqeddsen, xenni ixs ad d asen iwc tmenyat, <sup>19</sup>inna “Ewc ayi i necc ęawed řřulřa-ya ģima man wen mma x i ęa ssarseę afus inu ad iqbeř Arruĥ Iqeddsen.” <sup>20</sup>Inna as Buřrus “Ad teteĥĥa nnuqart nnek akik, minzi ittyiř ac ad tkesbed nniemet n Arebbi s tmenyat. <sup>21</sup>War ęarek bu tesęart uřa d ca deg wawař-a minzi uř nnek war ięi isegged zzat i Arebbi. <sup>22</sup>Tub zi tuęeffna nnek uca ttar i Arebbi maĥend ad xak itwayřar uxarrař-a n wuř nnek, <sup>23</sup>minzi ttwařiy aqqa cek deg ict n ‘xull’ (=aĥrir amarzag ařřas) u deg ij n uceddi n min war iseggeden.” <sup>24</sup>Yarr-d Simean, inna “Ttarem i Arebbi xafi ģima war d ittis xafi ca zi min tennam.” <sup>25</sup>Xenni nitni, awarni řami cehden u ssiwřen s wawař n Arebbi, ęeqben ęar Urcalim uca barrĥen s řexbar ařebĥan deg wařřas n ředcur n Isamariyyen.

### ***Aseyđas n řewzir n Itiyubiya***

<sup>26</sup>Uca ij n lmalak n Sidi issiweř ak-d Filibbus, inna “Kkar, truĥed ęar ljanub deg webrid i d ihwan zi Urcalim ęar Yazza i ięan di řexřa.” <sup>27</sup>Ikkar iruĥ. Xřar, aqqa din ij n weryaz zi Itiyubiya, tuęa-t d ij n weryaz umi deqfen, aqqa-t d řewzir n tgeldit n Kandaki, tajeęidt n Itiyubiya, tuęa-t x marra řeknuz nnes, tuęa yusi-d ęar Urcalim ģima ad *din* iębed. <sup>28</sup>Ięqeb-d, iqqim x ukarru nnes, tuęa iqqar *deg wedlis* n umkacaf Icaęya. <sup>29</sup>Inna Arruĥ i Filibbus “Zid, tmuned ak-d ukarru-ya.” <sup>30</sup>Yuzzeř-d ęares Filibbus, isřa as iqqar *zeg wedlis* n umkacaf Icaęya, inna “Ma tfehmed min teqqared?” <sup>31</sup>Inna as “Mammec izemmar mařa war din ĥed i d ayi i ęa isseřfemen?” Uca ittar zi Filibbus maĥend ad yenya uca ad kis iqqim. <sup>32</sup>Udem i tuęa iqqar *zeg wedlis* d wa

“Amecnaw ij n icarri itwandeĥ ęar řgurnet ģima ad zzayes ęarsen,  
amecnaw izmar ignun qibač i wenni d as ięasen,  
war yarzim ca aqemum nnes.

<sup>33</sup>*Deg useħqar nnes itwakkes xas řħukm.*

*Wi i ya iεawden x jjiř nnes?*

*Minzi tudart nnes ad tetwakkes zi tmurt.” Ica. 53:7-8*

<sup>34</sup>Yarr-d řewzir x Filibbus, inna “Ttettarey zzayek x wi xef issawař umkacaf man aya, ma x yixef nnes niy x ijjen nneđni?” <sup>35</sup>Yarzem Filibbus aqemmum nnes, uca, umi ibda zeg wawař nni, ibarreħ as s Yeccu. <sup>36</sup>Am tuya gguren nitni deg webrid, iwđen yar ca n waman. Inna řewzir “Xzar, aqqa din aman. Min d ayi i ya imenεen maħend ad twassyedşey?” <sup>37</sup>Inna Filibbus “Mařa tumned s wuř nnek marra, tħeġeř!” Uca netta yarr-d, inna “Umney belli Yeccu Lmasiħ d mmis n Arebbi.” <sup>38</sup>Yumur ad ibedd ukarru, hwan deg waman Filibbus d řewzir jmie uca isseyđeş it. <sup>39</sup>Ařami d gaεden zeg waman, ixđef Arruħ n Sidi Filibbus uca řewzir war t izri ead, minzi netta iruħ deg webrid nnes s řefraħet. <sup>40</sup>Maca Filibbus itwaf di Azutu uca ibda ittcuqqa di tmurt, ittbarreħ s řexbar aşebħan i marra tineddam ařami d yiweđ yar Qayşariya.

### ***Cawul deg webrid yar Dimacq***

**9**<sup>1</sup>U Cawul, am tuya ead ittşuđ s uεeddi d řmewt đidd n imeħđaren n Sidi, iruħ yar uzeġif n ikehhanen, <sup>2</sup>ittar zzayes tibratin yar Dimacq i isinagugen *inni din iřan*, maħend, mařa yufa ca n inni iđeffaren abrid *nni*, iryazen niy timyarin, ad ten-d indeh yar Urcalim. <sup>3</sup>Řami *din* iruħ, imsar, am tuya ittqarrab yar Dimacq, tenneđ as-d deyya ict n tfawt zeg ujenna. <sup>4</sup>Iwđa yar tmurt, xenni isřa ict n tmijja teqqar as “Cawul, Cawul mayemmi d xafi tdarrced?” <sup>5</sup>Inna “Min teenid cek, a Sidi?” Inna as Sidi “Necc d Yeccu wenni x tdarrced. Iqseħ xak ad tεeřsed x tyarsa.” <sup>6</sup>Uca netta, am tuya ittarjiji u ittħeyyar, inna “A Sidi, min tεxed ad ggey?” Inna as Sidi “Kkar, tudfed yar tendint, ad ac itwanna min ittxeşş ad tegged!” <sup>7</sup>Uca iryazen inni kis isafaren, bedden ttbehten. Nitni sřin tmijja, maca war řrin ħed. <sup>8</sup>Ikkar Cawul zi tmurt uca řami yarzem tiřřawin nnes, war izri ħed u nitni gewwden t zeg ufus uca nedhen t yar Dimacq. <sup>9</sup>řřata n wussan tuya war ittwiři, war icci, war iswi. <sup>10</sup>Tuya *din* di Dimacq ij n umehđar qqaren as Ananiyas. Uca Sidi inna as deg ij n řewħiy “A Ananiyas!” Inna as “Aqqa-yi danita, a Sidi!”

<sup>11</sup>Inna as Sidi “Kkar, truħed Ƨar webrid umi qqaren ‘abrid isseggden’, xenni di taddart n Yahuda, seqsa x ij n weryaz zi Tarsus, qqaren as Cawul, xzar, aqqa ittzaġa, <sup>12</sup>yusi-d Ƨares deg ij n řewħiy, aqqa ij n weryaz qqaren as Ananias yudef-d uca issars xas afus nnes ħima ad idweř ittwařa Ƨawed.” <sup>13</sup>Yarr-d Ananias “A Sidi, aqqa sřiy zeg wařas n *iwdan* x weryaz-a meċař d řƧar i igga deg imqeddasen nnek di Urcalim. <sup>14</sup>Aqqa da Ƨares ttesriħ zeg *upezdis* n arruyas n ikehhanen maħend ad iħebbes marra inni ittřayan x yisem nnek.” <sup>15</sup>Maca Sidi inna as “Ruħ minzi wa aqqa-t Ƨari d řqecet itwaxdaren ħima ad issiweđ isem inu Ƨar řegnus u zzat i ijeġiden u Ƨar tarwa n Israyil, <sup>16</sup>minzi ad as ssecney meċař ittxeřs i Ƨa iweddeb di řtwee n yisem inu.” <sup>17</sup>Iruħ Ananias, yudef di taddart, issars xas afus nnes, inna “A uma Cawul, aqqa Sidi, Yeccu wenni d ac-d iđharen deg webrid i zi d tusid, issekk ayi-d ħima ad tettwařid Ƨawed uca ad tetwaccured s Arruħ Iqeddsen.” <sup>18</sup>Řexdenni deg wemcan tewđa-d zi titřawin nnes ca amecnaw taqçurt uca idweř ittwařa Ƨawed, ikkar uca itwasseyđeř.

### ***Cawul ibda ittbeccar di Dimacq***

<sup>19</sup>Umi icca, imħeđ. Iqqim Cawul ca n wussan ak-d imeħdaren di Dimacq, <sup>20</sup>řexdenni ibda ittbarreħ s Lmasiħ deg isinagugen, belli netta d mmis n Arebbi. <sup>21</sup>Marra inni tuƧa ittessran, ttbehten, nnan “Ma war iġi d wanita i tuƧa ittareddġen inni tuƧa ittřayan s yisem-a di Urcalim, *ma war iġi* d wenni i d yusin da maħend ad ten icarf u ad ten igewwed Ƨar arruyas n ikehhanen?” <sup>22</sup>Maca Cawul tuƧa yarenni di jjeħd, issdehhac Udayen inni izeddyen di Dimacq am ten isseqnee belli wa d Lmasiħ. <sup>23</sup>Umi Ƨdun ařas n wussan, mcawaren Wudayen ħima ad t nřen. <sup>24</sup>Maca Cawul yargeb x nneyyet nsen. Nitni tuƧa ħeřtan tiwwura, s uziř uřa s ġiřet ħima ad t nřen. <sup>25</sup>Maca imeħdaren nnes ksin t s ġiřet, ssehwan t zi řħid am t ggin deg ict n tsuġet.

### ***Cawul di Urcalim***

<sup>26</sup>Umi d yusa Cawul Ƨar Urcalim, yarzu ad imun ak-d imeħdaren, maca marra ggweden zzayes, war ttiqqen ca belli netta d amehđar. <sup>27</sup>Maca Barnabas iksi t Ƨares uca indeh it Ƨar imazanen uca netta ixebbar iten mammec iřra Sidi deg webrid u mammec kis issiweř u mammec tuƧa ittbarreħ s yisem n Yeccu s teryast di Dimacq. <sup>28</sup>TuƧa

iqqim ittadef itteffey akidsen di Urcalim<sup>29</sup> uca ittbarreḥ s isem n Sidi s teryast, issawař ittqacaḥ ak-d Wudayen inni issawařen s tyunanit maca nitni arzun ad t nyen.<sup>30</sup> Umi ssnen tawmat man aya, nedhen t ɣar Qaysariya uca sekken t ɣar Tarsus.<sup>31</sup> Maca timesmunin di marra Yahudiyya d Ljalil d Samariya tuɣa daysent řehna, twabnant *di liman*, ggurent di tiggwudi n Sidi d ufewwej zi Arruḥ Iqeddsen, dewřent mɣarent.

### ***Asgenfi n Iniyas***

<sup>32</sup>Řami inned Buřrus di marra jwayeh, imsar iruḥ ɣar imqeddasen inni izeddyen di Lidda.<sup>33</sup> Yufa din ij n bna dem isem nnes Iniyas, teedu xas tmenya n iseggwusa u netta izzeř di qama, tuɣa-t d anedbař.<sup>34</sup> Inna as Buřrus “A Iniyas! Yeccu Lmasiḥ ad cek issgenfa. Kkar, tessud i xef nnek!” řexdenni ikkar deɣya.<sup>35</sup> Uca zřin t marra imezday n Lidda d Sarun uca tuben ɣar Sidi.

### ***Asnekkar n Tabita zi řmewt***

<sup>36</sup>Tuɣa di Yaffa ict n tmeḥđart qqaren as Tabita, isem wanita ixs ad yini ‘Durka’ (=yazala). Ta tuɣa teccur s řexdayem tiřebħanin u s řřdaqi i tuɣa tetticc.<sup>37</sup> Deg wussan nni tehřec uca temmut uca awarni řami tt ssirden, ssarsen tt di tyurfet.<sup>38</sup> Am tuɣa Lidda tudes Yaffa ssekken imeḥđaren, umi sřin belli Buřrus aqqa-t din, tnayen n yeryazen ħima ad zzayes ttaren maħend war ittetřtař ad ɣarsen-d yeedu.<sup>39</sup> Ikkar Buřrus, yuyur akisen. Řami d yiweđ, nedhen t ɣar tyurfet sennej. Beddent-id ɣares marra tijař, runt, sscanent as tcamirat d ijeğaben i tuɣa tettegg Durka ařami tuɣa-tt ead akisent.<sup>40</sup> Maca Buřrus issuffey itent marra ɣar barra, isjed uca izzuğ. Řami d inneqřeb, izra arrimet, inna “Tabita, kkar!” Nettat tarzem tiřřawin nnes uca řami tezra Buřrus, teqqim.<sup>41</sup> Isswized ɣares afus nnes uca issnekkar itt-id, xenni iřaya x imqeddasen d tijař, isscen asen tt, belli aqqa teddar.<sup>42</sup> Iffey-d řexbar-a ɣar Yaffa marra uca ařas idewřen umnen di Sidi.<sup>43</sup> Uca iqqim ca n wussan di Yaffa ɣar ij n weryaz wenni tuɣa ieeddeř iřmawen, qqaren as Simean.

*Buṭrus d řqebṭan arumani Kurniliyus*

**10** <sup>1</sup>Tuṭa di Qayṣariya ij n weryaz isem nnes Kurniliyus, aqqa-t d řqebṭan x meyya n řkumpaniyyet umi qqaren “Aṭalyan”. <sup>2</sup>Netta tuṭa ittweqqar u itteggwed Arebbi ak-d aytbab n taddart nnes marra, itticc aṭṭas n řṣṣdaq i iwdan uca ikessi s řmeeruf i Arebbi řebda. <sup>3</sup>Wa izra nican deg ij n řewḥiy, tasaæeet tuṭa-tt eřaḥař d wiss tesa a n uziř, aqqa ij n lmalak zi Arebbi yudef-d řares, inna as “A Kurniliyus!” <sup>4</sup>Umi dayes inḍar tiṭṭawin nnes, igggwed netta aṭṭas, inna “Min din, a Sidi?” U netta inna as “Tizaḡitin nnek d řṣṣdaq i nnek iwḍent řar řiḍaret n Arebbi. <sup>5</sup>Uca řexxu, ssekk iryazen řar Yaffa, tearded x Simean wenni umi qqaren eawed Buṭrus. <sup>6</sup>Aqqa netta yarzef řar Simean, wenni iæddřen iřmawen, wenni řar iḡa taddart řar řebḥar. Wa ad ac yini min ittxeřšan ad tegged.” <sup>7</sup>Umi iruḥ lmalak wenni tuṭa issawařen ak-d Kurniliyus, iřaya netta x tnayen zeg ixeddamen nnes u eawed x ij n ueskari itteggweden Arebbi, inni tuṭa akis řebda. <sup>8</sup>Awarni řami ten ixebbar x kuřci, issekk iten řar Yaffa. <sup>9</sup>Xenni tiwecca nnes, am tuṭa-ten deg webrid ttqarraben řar tendint, iḡæeed Buṭrus x tzeqqa, ḥima ad izzaḡ. Tasaæeet tuṭa-tt eřaḥař wiss setta. <sup>10</sup>Iḡuz aṭṭas uca tuṭa immezri ad icc, uca, am tuṭa d as ssewjaden, iwyi t řewḥiy. <sup>11</sup>Izra ajenna yarzem uca ict n řqecet amecnaw ict n tecḍaḍt n tcuqqet tameqqrant zi řqeṭṭan ifsusen i itwaṭṭfen zi arebea n tyemmura nnes, tetwassehwa-d řar tmurt. <sup>12</sup>Tuṭa dayes marra lḥayawanat n tmurt s arebea n iḍaren d řewḥuc d lḥayawanat inni ittbueen x tmurt d ijḍaḍ n ujenna. <sup>13</sup>Tusi-d ict n tmijja teqqar as-d “Kkar, a Buṭrus, řarř, tecced.” <sup>14</sup>Maca Buṭrus inna “Lla a Sidi, war cciiy eemmarř min war iḡeḡřen uřa min war izdigen.” <sup>15</sup>Tmijja tusi-d řares tawařa nneḍnit teqqar “Min issizdeg Arebbi, war d t tettarrid ca cek d řeḥram.” <sup>16</sup>Man aya imsar řřata n imuřen, xenni itwassgæeed řqecet eawed řar ujenna. <sup>17</sup>Am tuṭa Buṭrus ead ittxarrař deg yixef nnes min ixš ad yini řewḥiy i izra, xzar, tnayen n yeryazen inni d itwassekken zi Kurniliyus, bedden-d řar tewwart awarni řami sseqsan x taddart n Simean. <sup>18</sup>Řami řayan x yijjen, sseqsan, ma Simean umi ttkenan Buṭrus aqqa-t di taddart? <sup>19</sup>Umi tuṭa Buṭrus ead ittxarrař di řewḥiy i izra, inna as Arruḥ “Xzar, aqqa da řřata n yeryazen arezzun xak. <sup>20</sup>Kkar, tehwi-d, ruḥ akidsen nnebřa mma ad tcekked di ca, minzi d necc i ten-d issekken.” <sup>21</sup>Ihwa

Buṭrus ɣar yeryazen inni ɣares-d issekk Kurniliyus, inna “Xzar, aqqa d necc wenni i xef tarezzum. Min ɣar d tusim da?”<sup>22</sup>Nnan as “Aqqa Kurniliyus, řqebṭan x meyya wenni d ij n weryaz isegged itteggwed Arebbi, wenni i xef cehhden mliḥ Wudayen zi řgens marra, ij n lmalak iqeddsen tuɣa ičrem as deg ij n řewḥiy zi Arebbi maḥend ad cek iearḍ ɣar taddart nnes, ad zzayek iseř awařen.”<sup>23</sup>Issidef iten ɣar daxeř, iggi ten d inewjiwen. Tiwecca nnes iffey Buṭrus akidsen d ca n tawmat inni iğan zi Yaffa, ruḥen akis.<sup>24</sup>Farwecca iwḍen ɣar Qayşariya. Kurniliyus tuɣa ittraja ten, iearḍ-d x řehbab nnes u x ca n imeddukař i t-id yudsen maḥend ad munen.<sup>25</sup>Umi yudef Buṭrus, iřqa t-id Kurniliyus, iwḍa as ɣar iḍaren uca isjed as.<sup>26</sup>Issekkar it Buṭrus, inna as “Kkar, aqqa uřa d necc d bna dem!”<sup>27</sup>Am kides issawař, yudef uca yufa din aṭṭas munen.<sup>28</sup>Inna asen “Kenniw tessnem aqqa war iḥeđer x weryaz Uday ad imun ak-d ij n ubarrani niy ad ɣares-d iqarreb. Maca Arebbi isscen ayi belli war icuwwar ad řayiy uřa x ijj n bna dem d řehram niy d amengus.<sup>29</sup>X uyenni usiy-d eawed da nnebřa mma ad cekkey di ca umi dayi tearded. Řexxu sseqsiy cek, mayemmi xafi-d tearded?”<sup>30</sup>Inna as Kurniliyus “Arebea n wussan zeg wami tuɣa zummey ař tsæeet-a uca di tsæeet wiss tesa tuɣa ttzağiy di taddart inu. U xzar, ij n weryaz ibedd-d qibač inu s warruḍ ittceeciēen,<sup>31</sup>inna ‘A Kurniliyus, tažağit nnek tetwaseř d řşdaqi nnek iwḍent ɣar řiḍaret n Arebbi.<sup>32</sup>Sekk ɣar Yaffa, tearded x Simean wenni umi ttkennan Buṭrus, aqqa netta d anewjiw di taddart n Simean, wenni ieeddřen iřmawen, tenni ɣar řebḥar. Aqqa netta, meřmi mma yusi-d da, ad kik issiweř.<sup>33</sup>X uyenni ssekkey-d ɣarek řexdenni u cek aqqa teggid mliḥ umi tusi-d da. Neccin marra i da neğa qibač i Arebbi ḥima ad nseř marra min zi cek yumur Arebbi.”

### ***Arruḥ Iqeddsen ad d ihwa uřa x marra inni iğan zi řegnus***

<sup>34</sup>Yarzem Buṭrus aqemmum nnes uca inna “S tidett ufiy belli Arebbi war ittegg ca řfarz jar iwdan.<sup>35</sup>Maca wenni t itteggweden d wenni itteggen tasegda zi kuř řgens, aqqa netta yarḍa xas.<sup>36</sup>Awař i issekk ɣar ayt n Israyil maḥend ad ibarreḥ s řexbar ašebḥan n řehna s yisem n Yeccu Lmasiḥ, ‘wanita d Sidi n marra’,<sup>37</sup>aqqa tessnem řexbar i d iffyen di marra Yahudiyya i d ibdan zi Ljalil awarni asejdaş i zi tuɣa ittbarreḥ Yuḥanna,<sup>38</sup>řexbar zi jjihet n Yeccu Nnaşiri, mammec t

idhen Arebbi s Arruḥ Iqeddsen u s jjehd, wenni issara tamurt, igga řxar, issgenfa marra inni itwayezzan zeg ibřiš minzi Arebbi tuya-t akis. <sup>39</sup>Neccin d řechud s marra min igga di tmurt n Wudayen uřa di Urcalim. Aqqa nyin t, uyren t x teḥnact. <sup>40</sup>Wa issnekkar it-id Arebbi deg wass wiss řřata uca ejj it ad d iđhar, <sup>41</sup>maci i marra iwdan maca i řechud inni izwar ixđar iten Arebbi, i neccin inni akis iccin iswin awarni řami d itwassnekkar zeg imettinen. <sup>42</sup>Iweřřa aney ad nbarreḥ i iwdan, ad neched aqqa d netta i igga Arebbi d řqađi x inni iddaren d x inni immuten. <sup>43</sup>Cehhden xas marra imkacafen, belli kuř ijjen wenni zzayes i ya yamnen, ad as itwayfar ddnub nnes s yisem nnes.” <sup>44</sup>Am tuya Buřrus issawař ead, iwđa-d Arruḥ Iqeddsen x marra inni tuya ittesřan i awař. <sup>45</sup>Ttbehten řmumenin inni itwaxetnen inni i d yusin ak-d Buřrus, umi tamewci n Arruḥ Iqeddsen itwafarrey eawed x yinni iđan zi řegnus. <sup>46</sup>Minzi tuya ten ttesřan ssawařen s iřsawen, ssmeyyanan di Arebbi. Řexdenni yarr-d Buřrus <sup>47</sup>“Ma izemmar ḥed ad iqđee aman maḥend war twasseyđiřen ina, inni iqebřen Arruḥ Iqeddsen amecnaw neccin?” <sup>48</sup>Xenni yumur ad ten sseyđřen s isem n Sidi. Awarni uya ttaren zzayes ad iqqim ca n wussan.

*Agraw n imazanen di Urcalim x řmumenin zi řegnus*

**11** <sup>1</sup>Imazanen d tawmat inni iđan di Yahudiyya sřin belli uřa d řegnus tťfen deg wawař n Arebbi. <sup>2</sup>Ařami igaeēed Buřrus yar Urcalim, qaçen akis inni iđan zeg tebridt n wextan, <sup>3</sup>nnan “Aqqa cek tudfed yar iwdan i war itwaxetnen uca teccid akidsen.” <sup>4</sup>Maca Buřrus ibda ad asen iēawed s uradduf, inna <sup>5</sup>“Nec tuya-yi di tendint n Yaffa ttzađiy uca zriy, řami d yari yusa řewḥiy, ict n řqecet amecnaw tacđadt n tcuqqet tameqqrant itwaťffen zi arebea n tyemmura nnes tetwassehwa-d, tiweđ-d yari. <sup>6</sup>Řami dayes xzarey mliḥ, fetney uca zriy lḥayawanat n tmurt s arebea n iđaren d řewḥuc d lḥayawanat inni ittbuēen x tmurt d ijđad n ujenna. <sup>7</sup>Sřiř awarni ayi ict n tmijja, tenna ayi ‘Kkar, a Buřrus, yars, tecced.’ <sup>8</sup>Maca necc nniy ‘Lla, a Sidi, eemmarř war yudif ead yar uqemmum inu min war iḥeđřen uřa min war izdigen.’ <sup>9</sup>Tarr-d xafi tmijja zeg ujenna eawed ‘Min issizdeg Arebbi, war d t tettarrid ca cek d řeḥram.’ <sup>10</sup>Man aya imsar řřata n imuren, xenni itwassgaeēed marra eawed yar ujenna. <sup>11</sup>U xzar, řexdenni bedden din řřata

n yeryazen ztat i taddart mani d ayi tuya, inni d itwassekken zi Qayşariya. <sup>12</sup>Inna ayi Arruḥ aqqa ittxeşş ad kisen raheḡ nnebřa mma ad cekkey. Xenni truḥ akidi eawed tawmat-a s setta uca nudef ḡar taddart n weryaz *nmi*. <sup>13</sup>Uca netta issargeb aneḡ mammec iřra ij n lmalak i d as ibedden di taddart nnes, inna as ‘Sekk iryazen ḡar Yaffa, tearded x Simean wenni umi tkennan Buřrus. <sup>14</sup>Netta ad ac issiweř awařen i zi i ḡa tetwassnejmed, cek d marra taddart nnek.’ <sup>15</sup>Umi bdiy ad ssiwřeḡ, ihwa-d Arruḥ Iqeddsen xasen am mammec xaney-d ihwa eawed ḡar umezwaru. <sup>16</sup>Uca fekkareḡ-d awař n Sidi, mammec inna ‘Yuḡanna tuya isseyđaş s waman maca kenniw ad twassyedşem s Arruḥ Iqeddsen.’ <sup>17</sup>Mařa Arebbi iwc asen *tamewci n Arruḥ Iqeddsen* i nitni nican am mammec i d aneḡ tt iwca i neccin inni yumnen di Sidi Yeccu Lmasiḥ, xenni min eniḡ necc maḡend ad sşbeddeḡ Arebbi?” <sup>18</sup>Umi sřin man aya, hedden, ssemyaren Arebbi, nnan “I xenni, Arebbi iwca uřa i řegnus maḡend ad tuben i tudart.”

### ***Tamesmunt n Lmasiḥ di Antiyuxiya***

<sup>19</sup>Inni itwazeḡeen zi ssibbet n řeḡşart i imsaren s ssibbet n Stifanus, řwan ḡar Finiqiya d Qubrus d Antiyuxiya am war ssiwiřen ak-d ḡed s wawař myir ak-d Wudayen waha. <sup>20</sup>Tuḡa din jarasen ca n yeryazen i iḡan zi Qubrus d Qayrawan inni, ařami d usin ḡar Antiyuxiya, tuḡa issawařen ak-d Wudayen inni tuḡa ḡarsen řḡard n Iyunaniyyen, barrḡen asen s Sidi Yeccu. <sup>21</sup>Tuḡa afus n Sidi akidsen uca ij n ubarru d ameqqran yumen, dewřen tuben ḡar Sidi. <sup>22</sup>Ikk-d řexbar xasen x imezzuyen n tmesmunt di Urcalim. Nitni ssekken Barnabas ḡima ad iřwa tamurt ař Antiyuxiya. <sup>23</sup>Ařami d yiweđ *din*, iřra nniemet n Arebbi, ifarḡ uca ieřem asen marra ḡima ad qqimen tcebbaren di Sidi elašab nneyyet n wuř *nsen*. <sup>24</sup>Minzi tuḡa-t d aryaz isegged iccur s Arruḥ Iqeddsen d liman uca ij n ubarru d ameqqran *n iwdan* immarni-d ḡar Sidi. <sup>25</sup>Xenni iruḡ ḡar Tarsus ḡima ad yarzu x Cawul <sup>26</sup>uca ařami t yufa, yusi-d zzayes ḡar Antiyuxiya. Uca imsar aqqa nitni munen di tmesmunt aseggwas ikmeř uca sşremden ij n řḡaci d ameqqran. Uca twasemman imeḡdaren d ‘imasihyyen’ i umur amezwaru di Antiyuxiya. <sup>27</sup>Deg wussan nni hwan-d ca n imkacafen zi Urcalim ḡar Antiyuxiya. <sup>28</sup>Uca ikkar ij n zwaysen qqaren as Agabus, ieřem s Arruḥ belli ij n řaz imḡar ad yekk x marra ddunnit

wenni i d yusin nican deg wussan n qayšar Kludiyus. <sup>29</sup>Xenni kuř ijjen zeg imeħdaren igga ad issekk ca n twiza elašab tizemmar nnes ħar wawmaten i izeddyen di Yahudiyya. <sup>30</sup>Ggin amenni eawed, ssekken t i imyaren s ufus n Barnabas d Cawul.

***Aneqqi n Yaequb d ufekki n Buṭrus s ufus n ij n lmalak***

**12** <sup>1</sup>Di řweqt nni eřaħar išswizzed Hirudus afus nnes ħima ad ikarfes x ca n yinni iġan zi tmesmunt. <sup>2</sup>Inya Yaequb umas n Yuħanna s ssif <sup>3</sup>uca umi izra aqqa man aya isjeb asen i Wudayen, ikemmeř deg webrid nni maħend ad iħebbes Buṭrus eawed. Tuya d ussan n weyrum nnebřa antun. <sup>4</sup>Ařami t ittef, igg it di řeħbes, igga xas arebea n ieessasen ħima ad xas eessen, tuya ixs ad t iqeddem ztat i iwdan awarni řeid n weyrum nnebřa antun. <sup>5</sup>Tuya eessen x Buṭrus di řeħbes, maca tamesmunt tuya tzaġa i Arebbi s jjeħd di ttewee nnes. <sup>6</sup>Am tuya Hirudus ead izem ad t iqeddem, tuya Buṭrus ittetteř di ġiřet nni jar tnayen n ieessasen n řeeskar, qqnen t s tnayen n snaseř. Uca ieessasen tuya tteessan eawed ħar tewwart n řeħbes. <sup>7</sup>Xzar, ij n lmalak n Sidi tuya ibedd-d din, tteya n tfawt tettceecie deg wexxam uca netta iearn Buṭrus deg uyezdīs, issfaq it, inna “Kkar deyya!” Uca wđant snaseř zeg ifassen nnes. <sup>8</sup>Inna as lmalak “Byes, teqqned tisira nnek!” Igga ammu. Inna as “Ard ajeġab nnek, teđfared ayi-d!” <sup>9</sup>Xenni iffey, idfar it, war issin min d as igga lmalak, ma man aya d tidett, ittyiř as izra ij n řewħiy. <sup>10</sup>Ařami kkin x ueessas amezwaru d x wenni wiss tnayen, iwden ħar tewwart n wuzzař tenni ittawyen ħar tendint, tennurzem asen weħdes. Awarni řami zzayes ffyen, qeđeen ict n zzenqet, řexdenni iji t lmalak. <sup>11</sup>Umi d idweř Buṭrus ħar řbař nnes, inna “Řexxu ssney s tidett belli Sidi issekk-d lmalak nnes, issenjem ayi zeg ufus n Hirudus u zi marra min ittraja ad ayi yegg weydud n Wudayen.” <sup>12</sup>Ařami iften s man aya, řexdenni iruħ ħar taddart n Maryem, yemmas n Yuħanna wenni ittkennan Marku, mani tuya ttmunen ařtas, ttezaġan *din*. <sup>13</sup>Ařami issqarqeb di tewwart n barra, tusi-d ict n tayya isem nnes Ruda ħima ad tseř *wi dinni*. <sup>14</sup>Umi teeqeř tmijja n Buṭrus, war tarzim ca tewwart zi ssibbet n řefraħet nnes, maca tuzzeř ħar daxeř uca txebbar *iten* belli Buṭrus aqqa ibedd ħar tewwart. <sup>15</sup>Nnan as “Aqqa cem txeřfed!” Maca nettat teqqimed teqqar aqqa man aya nican. Nitni nnan “Aqqa-t d ij n lmalak!” <sup>16</sup>Maca

Buþrus iqqim issqarqub uca ařami d as arezmen, žrin t uca ttbehten. <sup>17</sup>Iceyyar asen s ufus nnes ĥima ad sqaren uca iawed asen mammec t-id issuffey Sidi zi řehbes, inna “Xebbarem Yaęqub d tawmat x uya. Xenni iffey řar ij n wemcan nneđni.” <sup>18</sup>Řami d yiweđ uziř, imsar ij n uxorweđ maci drust jar řeeskar x min imsaren i Buþrus. <sup>19</sup>Maca Hirudus umi xas tuřa yarezzu, war t yufi, uca awarni řami isstenteq iessasen, yumur ad ten nedhen řar ccræ uca iruĥ zi Yahudiyya řar Qayřariya, izdey dinni.

### **Řmewt n Hirudus Agribba**

<sup>20</sup>Tuřa Hirudus isxeđ x ayt n Tirus d Sidun. Maca nitni arezfen-d řares amecnaw ij n bnađem, ssqeneen Blastus axeddam iceneen n ujeĝid (=wenni tuřa x tmesřayin n řeqřar n ujeĝid), ttaren as ařřaĥ, minzi macca n tmurt nsen tekk-d zi tenni n ujeĝid. <sup>21</sup>Deg ij n wass i tuřa nwan, yarđ Hirudus ajeĝab igellden, iqqim x řkursi n ccræ, issawař akisen. <sup>22</sup>Uca iwdan syuyen řares “Aqqa-tt d tmijja n ij n arebbi, maci n bnađem.” <sup>23</sup>Řexdenni iwta it ij n lmalak n Sidi, minzi netta war iwci æuĝi i Arebbi. Uca ccin t ikeccawen, iffey zzayes buĥbeř. <sup>24</sup>Awař n Arebbi tuřa iggam, imeqqar. <sup>25</sup>Barnabas d Cawul eqqben-d zi Urcalim awarni řami kemmřen tasexxart nsen uca iwyen akisen Yuĥanna, wenni umi ttkennen Marku.

### **Řixđaret n Barnabas d Cawul i řxedmet**

**13** <sup>1</sup>Tuřa din di Antiyuxiya di tmesmunt imkacafen d imseřmaden: Barnabas, d Simean wenni ittkennan Nijer, d Lukiyus zi Qayrawan, d Manaęin wenni itwarebban ak-d Hirudus řĥakem x ij n arbae n tmurt, d Cawul. <sup>2</sup>Am tuřa nitni ebbden i Sidi, ttzumman, inna Arruĥ Iqeddsen “Farzem ayi-d Barnabas d Cawul i řxedmet tenni umi d asen-d řayix.” <sup>3</sup>Xenni žummen žžuĝen uca ssarsen xasen ifassen, jjin ten ad rařen.

### **Asafar řar Qubrus**

<sup>4</sup>Ina xenni, am tuřa d twassekken zi Arruĥ Iqeddsen, řřfen abrid řar Salukiya uca ssenni ruřen di řebĥar řar Qubrus. <sup>5</sup>Umi iwđen řar Salamis, barrřen s wawař n Arebbi deg isinagugen n Wudayen. Tuřa Yuĥanna ittsexxar iten. <sup>6</sup>Awarni řami zwan tagzirt ař Bafus, ufin din

ij n usehħar, netta d ij n umkacaf issxarriqen, qqaren as Bar-Yeccu. <sup>7</sup>Tuħa-t ak-d lwali Sarjiyus Bulus. Netta d ij n weryaz d amiħis. Wanita iħaħa-d i Barnabas d Cawul, tuħa immezri ad iseħ awaħ n Arebbi. <sup>8</sup>Maca Ilimas (*am mammec d as qqaren i Bar-Yeccu s tgrigit*), asehħar, tuħa itteekkas iten, yarzu ad issbeeed lwali x liman. <sup>9</sup>Maca Cawul umi qqaren eawed Bulus, tuħa iccur s Arruħ Iqeddsen, iħear dayes mliħ, inna <sup>10</sup>“A cek, a mmis n ibħis, aqqa cek teccured s kuħ řyec d teħraymect, cek d řeudu n marra tasegda, ma aqqa cek war tbedded ca ad txarweĊed ibriden iseggden n Arebbi. <sup>11</sup>Řexxu, xzar, aqqa da afus n Arebbi i cek i ħa ixegħsen, ad tdewřed d adaryaħ, war tettwiřid tfuct i ij n řmijaħ. Řexdenni tewĊa-d xas tayyut d tağest uca tarr it iddura, yarezzu wi t i ħa igewwden zeg ufus. <sup>12</sup>Řami iħra lwali min imsaren, yumen, ittebhet di tyuri n Sidi.

### **Yar Birxa d Antiyuxiya**

<sup>13</sup>Bulus d inni akis iffħen zi Bafus x řebħar uca usin-d ħar Birxa di Bamfiliya, maca Yuħanna yuyur xasen uca ieqeb ħar Urcalim. <sup>14</sup>Maca nitni ruħen zi Birxa kkin x tmurt uca iwĊen ħar Antiyuxiya, ict n tendint di *jwayeh* n Bisidiya uca udfen ħar usinagug deg wass n ssebt uca qqimen. <sup>15</sup>Awarni tiħri n ttawrat d imkacafen, ssekken ħarsen imeqqranen n usinagug, nnan “A iryazen tawmat, maħa tuħa ħarwem ij n wawaħ n ucejħee i iwdan, inim t.” <sup>16</sup>Ikkar Bulus iceyyar s ufus nnes, inna “A kenniw, iryazen n Israyil u kenniw inni itteggweden Arebbi, sřem! <sup>17</sup>Arebbi n weydud-a Israyil tuħa ifarz řejdud nney uca issgaeeed řgens aħami ten tuħa d ibarraniyyen di tmurt n Miħra uca issuffey iten s ufus yueħan nnes <sup>18</sup>uca tuħa iħbar xasen řmijaħ n arebein iseggwusa di řexħa. <sup>19</sup>U awarni řami iteħħa seba n řegnus di tmurt n Kanean, iwc asen tmurt nsen d řwart. <sup>20</sup>Awarni man aya di řmijaħ n eħaħaħ areba meyya u xemsin iseggwusa, iwc asen řquĊat aħ řweqt n umkacaf Samwil. <sup>21</sup>Zi ssenni ttaren ij n ujeğid uca Arebbi iwc asen Cawul, mmis n Kis, ij n weryaz zi teqbiĊ n Binyamin, řmijaħ n arebein iseggwusa. <sup>22</sup>Awarni řami t ikkess, issgaeeed asen Dawud d ajeğid, wenni umi x iched eawed *ammu*

‘Ufiħ Dawud mmis n Yassa, wa d ij n weryaz yusi-d x řħaĊar inu, wenni i ħa iggen marra min xsey necc.’ 1 Sam 13:14

<sup>23</sup>Zi zzariëet nnes igga Arebbi n Israyil amsenjem Yeccu am mammec tuya zzayes iwaed, <sup>24</sup>awarni řami izwar Yuřanna ittbarreh s uřeydař n ttubet i marra iwdan n Israyil qbeř mma ad d yas Yeccu. <sup>25</sup>Umi yiweř Yuřanna ikemmeř tasexxart nnes, inna ‘Min d awem ittyiř aqqa d necc, war řiy d wenni. Maca, xřar, netta ad d yas awarni ayi, necc war sdiheřey ad as fesyey *ifiřan n sandaliyat nnes.*’ <sup>26</sup>A iryazen tawmat, tarwa n Ibrahim d inni i din jarawem itteggweden Arebbi, i kenniw umi d itwassekk awař n usenjem-a. <sup>27</sup>Minzi imezday n Urcalim d imeqqrannen nsen, am war t ssinen, aqqa kemmřen awařen n imkacafen i iqqaren kuř *ass n ssebt*, umi xas řekmen. <sup>28</sup>Waxxa war ufin uřa d ijj n řesbab řima ad xas řekmen s řmewt, aqqa ttaren zi Bilatuř řima ad itwaney. <sup>29</sup>Umi kemmřen marra min xas yuran, ssehwan t-id zi teřnact uca ssarsen t deg wenđerř. <sup>30</sup>Maca Arebbi issnekkar it-id zeg imettinen. <sup>31</sup>Iřhar asen-d ařřas n wussan i inni kis gaeden zi Ljalil řar Urcalim, inni *iřan d řechud nnes řar iwdan.* <sup>32</sup>Neccin nettbarreh i kenniw s řwaed i itwannan i řejdud, *řwaed* i tuya ikemmeř Arebbi i neccin inni *iřan d tarwa nsen*, am *Arebbi tuya d issnekkar Yeccu zi řmewt.* <sup>33</sup>Am mammec tura deg usebbiř *n Dawud* wiss tnayan

*‘Cek d mmi, ass-a jjiy-d cek!’ sbř. 2:7*

<sup>34</sup>U ařami t-id issnekkar zeg imettinen ař war ittkicca emmarř, aqqa ammu t inna

*‘Necc ad awem wcey lbaraka tařdiqt n Dawud.’ Ica. 55:3*

<sup>35</sup>X uyenni iqqar ewed deg ij n usebbiř nneřni

*‘Cek war tettejjid amqeddas nnek ad ikiccu.’ sbř. 16:10*

<sup>36</sup>Minzi Dawud, awarni řami ixdem i cwar n Arebbi jar jjiř nnes, immut, ssarsen t *deg wenđerř* ak-d řejdud nnes, xenni ikiccu. <sup>37</sup>Maca wenni d issnekkar Arebbi, war ittkicca. <sup>38</sup>A iryazen tawmat, ad tessnem xenni belli s wanita ad awem itwabarreh s weřfar n ddnub <sup>39</sup>u belli kuř ijjen wenni yumnen s wanita ad itwasegged zi marra i zi war tzemmarem ad twaseggdem s ttawrat n Musa. <sup>40</sup>Řřam řima

war xawem d iweṭṭi ca n min itwannan deg idlisen n imkacafen

*41*“Xzarem, a kenniw inni issehqaran, tæjebem u tweddarem,  
minzi necc ad ggey ict n řxedmet deg wussan nwem i war tettiqqim  
waxxa iæawed awem tt ca n ijjen.’ ” Hab. 1:5

<sup>42</sup>Řami ffyen Wudayen zeg usinagug, ttaren zeg inni zi řegnus ħima ad kisen ssiwřen s wawařen d ijjen deg wass n ssebt i d ya yasen. <sup>43</sup>Řami imsebða umuni n usinagug, aṭṭas n Wudayen d waṭṭas n imeacaren n Wudayen idiyaniyyen đfaren Bulus d Barnabas, inni xenni tuya kisen issawařen, eərmen asen ħima ad qqimen di nniemtet n Arebbi. <sup>44</sup>Deg wass n ssebt i d yusin tusi-d tendint eřaħař marra ħima ad tseř i wawař n Arebbi. <sup>45</sup>Ařami žrin Wudayen abarru n řyaci, dewřen eemmare n s řehsed, eeksen min xef issiweř Bulus, qacħen u ceqqfen. <sup>46</sup>Maca Bulus d Barnabas nnan s teryast “Tuya ittxeřř ad awem nessiweř d amezwaru x wawař n Arebbi maca tugim, tħekmem x yixef nwem belli war tesdiheğem tudart n řebda, aqqa neccin ad nwejjeh řegnus. <sup>47</sup>Minzi ammu d aneř iweřřa Sidi, iqqar

*‘Necc arriy cek d tifawt n řegnus, ħima ad tiřid i usenjem  
waxxa ař tťarf n ddunnit.’ ” Ica. 49:6*

<sup>48</sup>Umi sřin řegnus man aya, farħen ssemyaren awař n Sidi uca umnen marra inni tuya itwafarzen i tudart n řebda. <sup>49</sup>Awař n Arebbi iffey ħar tmurt nni marra. <sup>50</sup>Maca Udayen ssenhezzen timyarin tinni tuya itteggweden Arebbi d tinni ħarsent ccan uřa d imcenneten n tendint, ssekkaren ict n řehřart x Bulus d Barnabas uca ssuffyen ten barra i tmurt nsen. <sup>51</sup>Maca nitni zzerzen taeejjajt x iđaren nsen xasen uca ruħen ħar Iquniya <sup>52</sup>uca imeħđaren dewřen ccuren s řefraħet n Arruħ Iqeddsen.

### ***Tabarreħt n řexbar ařebħan di Liqaenya***

**14** <sup>1</sup>Imsar di Iquniya aqqa udfen jmie ħar usinagug n Wudayen uca ssiwřen ařami umnen aṭṭas n řyaci n Wudayen d Iyunaniyyen. <sup>2</sup>Maca Udayen inni war yuminen, sseigħten u ssarezgen řxađar n yinni zi řegnus đidd i tawmat. <sup>3</sup>Kkin dinni aṭṭas, ttbarħen

s teryast di Sidi wenni i tuya itticcen chadet i wawař n nniemet nnes uca igga řeřamat d Imuejizat s ifassen nsen. <sup>4</sup>Uca řyaci n tendint imsebđa u ca zžaysen ruřen ak-d Wudayen u ca nneđni ak-d imazanen. <sup>5</sup>Umi imsar ij n uxorweđ n inni zi řegnus uřa n Wudayen ak-d imeqqranen nsen, ĥima ad xasen karfsen u ĥima ad ten arejmen, <sup>6</sup>xenni, awarni řami mcawaren jarasen, arewřen ĥar tneddam n Likæunya, aqqa-ten d Listra d Dirbi u ĥar jwayeh i d as-d innđen <sup>7</sup>uca ttbarrĥen dinni s řexbar asebĥan.

### ***Aĥejjar n Bulus di Listra d Dirbi***

<sup>8</sup>Tuĥa izeddeĥ di Listra ij n weryaz i war ĥar iĝi jjehd deg iđaren nnes, aqqa-t d aneđbař zeg uęeddis n yemmas, war yuyur eemmarř. <sup>9</sup>Tuĥa ittesřa i Bulus am issawař netta, u wanita umi dayes ijear mliĥ, izra dayes liman ĥima ad itwassgenfa, <sup>10</sup>inna s ict n tmijja tejhed “Kkar, tbedded nican x iđaren nnek!” Ikkar ingez, ibda iggur zi ssa ĥar diha. <sup>11</sup>Řami izra řyaci min igga Bulus, ssgæeden tmijja nsen, nnan s řĥarđ n Likæunya “Aqqa irebbiten dewřen arewsen deg iwdan, hwan-d ĥarney!” <sup>12</sup>uca semman Barnabas s yisem ‘Zayus’ u Bulus s yisem ‘Hirmis’, minzi netta izwar ĥar wawař. <sup>13</sup>Uca akehhan n Zayus x tendint nni, awarni řami d yiwi iyenduzen d timrisin n ijejjigen (=nnuwwac) ĥar tiwwura n tendint, tuĥa ixs ad iqeddem tiĥarřin ak-d řyaci. <sup>14</sup>Maca ařami sřin imazanen Barnabas d Bulus x man aya, carrgen arruđ nsen uca negzen jar řyaci, sĥuyyun <sup>15</sup>“A iryazen, mayemmi i tetteggem aya? Uřa d neccin d ij n lbacar d ijjen amecnaw kenniw, nettbarreĥ s řexbar asebĥan ĥima ad tbeęedem x tmesřayin-a ibeřřren ĥima ad tubem ĥar Arebbi iddaren i d ixeřqen ajenna d tmurt d řebĥar d marra min daysen. <sup>16</sup>Netta iija řegnus ad uyuren deg ibriden nsen di řweqt n jjiřat iedun. <sup>17</sup>Waxxa amenni *Arebbi* war iiji ixef nnes nnebřa chadet am ittegg tcuni zeg ujenna, iwca aney-d anřar d iseggwusa n řřabet, iccur uřawen nney s macca d řefraĥet.” <sup>18</sup>Waxxa ssawařen amenni, tuĥa ead iqseĥ xasen ad sbedden řyaci maĥend war ttqeddimen tiĥarřin. <sup>19</sup>Maca usin-d Wudayen zi Antiyuxiya d Ikuniya, ssqeneen řyaci uca arejmen Bulus, jarren t barra i tendint, ittyiř asen aqqa immut. <sup>20</sup>Maca am d as nnden imeĥđaren, ikkar uca yudef ĥar tendint. Xenni tiwecca nnes iffeĥ ak-d Barnabas ĥar Dirbi.

**Aeqab yar Antiyuxiya**

<sup>21</sup>Awarni řami barrħen s řexbar ařebħan di tendint u kewnen imeħđaren, eeqben ħar Listra d Iquniya d Antiyuxiya <sup>22</sup>ggin uř di řeemur n imeħđaren, eřmen asen ad cebbaren di liman u *eřmen asen* belli ittxeřř ad nadeř ħar tgeldit n ijenwan s wařtas n řeħřarat. <sup>23</sup>Awarni řami d asen arecħen imġaren di kuř tamesmunt, ssqebđen ten s tzaġit d użummi i Arebbi i zi yumnen. <sup>24</sup>Umi zwan Bisidiya, usin-d ħar Bamfiliya. <sup>25</sup>Ssiwřen s wawař di Birxa, xenni hwan-d ħar Attalya. <sup>26</sup>Zi ssenni ruħen di řebħar ħar Antiyuxiya mani tuya twassqebđen i nniemet n Arebbi qbeř mma ad bdan di řxedmet, tenni aqqa kemmřen tt. <sup>27</sup>Řami din iwđen, řaġan x tmesmunt, xebbaren s marra řexdayem timeqqrani n i yegga Arebbi s ifassen nsen u mammec yarzem tawwart n liman i řegnus. <sup>28</sup>Uca qqimen din ict n řweqt maci drust ak-d imeħđaren.

**Cwar n imazanen di Urcalim x wextan d ttawrat**

**15** <sup>1</sup>Hwan-d ca n iwdan zi Yahudiyya ħar Antiyuxiya uca bdan sseřmaden i tawmat “Mařa war tetwaxetnem ełahřab ttawrat n Musa, war tzemmarem ad tetwassnejmem.” <sup>2</sup>Xenni umi din ikkar ij n uxarweđ d unaqec akidsen zi řtarf n Bulus d Barnabas, war iġi drust waha, weřřan ad ssgaeeden Bulus d Barnabas d ca zzaysen ħar imazanen d imġaren di Urcalim. <sup>3</sup>Ina, umi twassqebđen zi tmesmunt, cuqqen di Finiqiya d Samariya uca xebbaren nican mammec tuben inni iġan zi řegnus, ssfarħen tawmat ařtas. <sup>4</sup>Řami iwđen ħar Urcalim, tareħħeb zzaysen tmesmunt d imazanen d imġaren u nitni xebbaren *ten* s marra min zzaysen igga Arebbi. <sup>5</sup>Maca nnan, aqqa din ca zi tebridt n Ifariisiyyen inni idewřen umnen, qqaren belli ittxeřř ad ten xetnen *i inni iġan zi řegnus* u ad ten weřřan ad cebbaren di ttawrat n Musa. <sup>6</sup>Munen imazanen d imġaren ħima ad mcawaren x wawař-a. <sup>7</sup>Ařami ikkar ij n uxarweđ d ameqqran, ibedd Buřrus inna asen “A iryazen tawmat, kenniw tessnem belli ařtas zeg wami Arebbi ixđar ayi ħima řegnus ad sřen awař n řexbar ařebħan s uqemmum inu uca ad zzayes amnen. <sup>8</sup>Arebbi, wenni issnen min iġan deg wuřawen, iched xasen am d asen iwca Arruħ Iqeddsen amecnaw i neccin <sup>9</sup>u netta war ittegg bu řfarz jar neccin d nitni, am issizdeg uřawen nsen s liman. <sup>10</sup>Iwa

řexxu, mayemmi tettjarrabem ead Arebbi u tetteggem ij n uzayřu x irawen n imeħđaren i war izemmar řejdud nney uřa d neccin ad t narbu? <sup>11</sup>Maca neccin numen, amecnaw nitni, s nniemet n Sidi Yeccu Lmasih, aqqa ad netwassenjem s webrid d ijjen akisen.” <sup>12</sup>Isqar řyaci, nitni sřan i Barnabas d Bulus tteawaden x řeřamat d lmuejizat timeqqrarin i zzaysen igga Arebbi jar řegnus. <sup>13</sup>Awarni řami kemmřen awař nsen, yarr-d Yaęqub, inna “A iryazen tawmat, sřem-d yari. <sup>14</sup>Simean ixebbar mammec tuya igga Arebbi amezwar ĥima ad issmun ij n weydud zi řegnus i yisem nnes. <sup>15</sup>Man aya ittas-d ak-d wawařen n imkacafen amecnaw mammec tura <sup>16</sup>Awarni man aya ad eęqbeę uca ad ssbeddeę eawed aqıđun iqeddsen n Dawud i tuya iwđan u min zzayes yareddęen ad t eedřeę uca ad t ssgaeędeę tawařa nneđnit, <sup>17</sup>ĥima řbaqi iqqimen n iwdan ad arzun x Arebbi uřa d marra řegnus i xef itwařayan s yisem inu, iqqar Sidi wenni i iggin marra man aya. <sup>18</sup>Marra řexdayem nnes aqqa twassnent yares zi řebda. <sup>19</sup>X uyenni ttwařiy icuwwar war nesseđqıř ca x inni ituben yar Arebbi zi řegnus, <sup>20</sup>maca ad asen nari, ad beęeden x min itwaxemjen zi lařnam u x tuqeħbit u x jjiyfa u x idammen. <sup>21</sup>Minzi Musa yares zi meĥař uya di kuř tandint inni itbarrřen zzayes uca itwassyar s min itwannan zi Musa kuř ass n ssebt deg isinagugen.”

### **Tabrat yar Antiyuxiya**

<sup>22</sup>Xenni mcawaren imazanen d imyaren ak-d marra tamesmunt ĥima ad ixđaren iryazen zi řwest nsen ĥima ad ten ssekken ak-d Bulus d Barnabas yar Antiyuxiya: Yahuda, umi qqaren eawed Barsabas, d Silas, iryazen nni tuya-ten d imeqqrannen jar tawmat. <sup>23</sup>Urin s ufus nsen ammu “Imazanen d imyaren d tawmat i tawmat i ięan zi řegnus inni ięan di Antiyuxiya d Suriya d Kilikiya: Sřam xawem! <sup>24</sup>Umi nesřa belli ca n yinni i d yusin zi řwest nney ředeen kenniw s wawařen nsen, ssenhezzen tanefsect nwem, qqaren belli ittxeřř ad tetwaxetnem umi neccin war numur s man aya. <sup>25</sup>Tuya ittęiř aneę aqqa mliħ, umi d nusa yar uxarrař d ijjen, maħend ad nfarz ca n yeryazen ĥima ad ten nessekk yarwem ak-d imeizzen nney Barnabas d Bulus. <sup>26</sup>Nitni d iryazen inni ittewwęen tudart nsen i yisem n Sidi Yeccu Lmasih. <sup>27</sup>Xenni nessekk-d Yahuda d Silas, inni kenniw i ya ixebbaren man aya eawed s uqemmum nsen. <sup>28</sup>Minzi tuya itęiř as mliħ i Arruħ

Iqeddsen uřa i neccin, belli war xawem nessedqir ca đđqeř ktar myir timesřayin tinni labudda zzaysent, aqqa d tina: <sup>29</sup>aggweji x min iqqarřen i lařnam uřa x idammen uřa x jjiyfa uřa x tuqeřbit. Mařa tbeeddem ixef nwem x man aya, ad teggem mliř. S ttisir.” <sup>30</sup>Awarni řami ten ssqebđen, iwđen yar Antiyuxiya uca ssmunen řřaci, wcin asen tabrat. <sup>31</sup>Řami tt yřin, farřen zeg ufewwej nni. <sup>32</sup>Yahuda d Silas, inni iğan eawed d imkacafen, eřmen i tawmat s wawařen ařtas u ssjehden ten. <sup>33</sup>Awarni řami qqimen dinni ařtas n řweqt, ssqebđen ten wawmaten s řehna řima ad dewřen yar imazanen *inni ten-d issekken*. <sup>34</sup>Maca ittyir as i Silas mliř mařend ad dinni iqqim. <sup>35</sup>Bulus d Barnabas qqimen di Antiyuxiya, sřaran ttbarrřen s wawař n Arebbi ak-d wařtas inneđni.

### ***Bulus d Barnaba ttemssebđan***

<sup>36</sup>Awarni ca n wussan inna Bulus i Barnabas “Ejj ad neeqeb yar tawmat nney di kuř tandint mani tuya nettbarreř s wawař n Arebbi, ad nargeb mammec i ya iffey umeddur nsen.” <sup>37</sup>Barnabas tuya ixš ad kisen indeh Yuřanna wenni ittkennan Marku, <sup>38</sup>maca Bulus inwa war kisen ittawi wa wenni i daysen isemřen di Bamfiliya u war kisen iruř yar řxedmet. <sup>39</sup>Ikkar ijj n umenyi d ameqqran jarasen ařami mmsebđan ijjen x wenneđni u Barnabas indeh akis Marku uca beřřaren yar tegzirt n Qubrus. <sup>40</sup>Maca Bulus ixđar Silas uca iffey, sellmen t wawmaten n nniemet n Arebbi <sup>41</sup>uca icuqq d Suriya d Kilisiya ittcejjae timesmunin.

### ***Timutiya ittrař ak-d Bulus d Sila***

**16** <sup>1</sup>Uca yusi-d eawed yar Dirbi d Listra. Xřar, tuya din ij n umeřđar qqaren as Timutiya, netta d mmis n ict n temyart d tudact d řmumena, maca babas d Ayunani. <sup>2</sup>Tawmat n Listra d Ikuniya cehden xas s řřar. <sup>3</sup>Bulus tuya ixš wa ad isafar akides. Xenni ikši t uca ixten as zi ssibbet n Wudayen inni tuya iğan di tneddam nni, minzi marra ssnen belli babas d Ayunani. <sup>4</sup>Umi kkin *Bulus d ca nneđni* x tneddam, sellmen řumur i itwařesben nican zi jjiřet n imazanen d imyaren di Urcalim, řima *timesmunin* ad daysen třfent. <sup>5</sup>Timesmunin dewřent beddent mliř di liman uca tuya leadad nsent imeqqar nhar x nhar.

### ***Bulus iżwa yar Masiduniya***

<sup>6</sup>Umi cuqqen nitni di Frixiya d jwayeh n Galaṭiya, imnee iten Arruḥ Iqeddsen maḥend ad beccaren s wawař di Asiya, <sup>7</sup>uca awarni řami d usin yar Misya, arzun ad raḥen yar Bitiniya, maca Arruḥ Iqeddsen war ten iji. <sup>8</sup>Umi kkin x Misya, hwan yar Truwas. <sup>9</sup>Izra Bulus ij n řewḥiy s ġiřet. Ibedd-d yares ij n weryaz din, ittar zzayes, inna “Hwa yar Masiduniya ĥima ad aneḡ tewcid ufus.” <sup>10</sup>Awarni řami iżra řewḥiy, nekkar řexdenni ĥima ad nraḡ yar Masiduniya, minzi nefhem *zi řewḥiy nni* belli Sidi iřaya aneḡ-d ĥima ad asen nbarreḡ s řexbar ařebḥan.

### ***Bulus di tendint n Filibbi***

<sup>11</sup>Aqqa nuyur di řebḥar zi Truwas uca nruḥ nican yar Samutraki, xenni tiwecca nnes *nruḥ* yar Niyabulis <sup>12</sup>u zi ssenni yar Filibbi, tenni d tandint tamezwarut di jwayeh-a n Masiduniya, tuḡa-tt deg ifassen n Irumaniyyen. Neqqim ca n wussan di tendint nni. <sup>13</sup>Deg wass n ssebt neffey zi tewwart n tendint yar tma n yeyzar mani tuḡa ttzaḡan *Wudayen* uca neqqim nessawař ak-d temyarin tinni tuḡa imunen *dinni*. <sup>14</sup>Tuḡa tessḥessa yarney ict n temyart, qqarent as Ludiya zi tendint n Tiyatira, tasebbabt n reḥrar zi tendint n Tiyatira, tenni tuḡa tēbbed Arebbi uca Arebbi yarzem as uř nnes ĥima ad tseř mliḥ mixef issawař Bulus. <sup>15</sup>Umi tetwasseyḡeř nettat d řeḥbab n taddart nnes, tettar zzayneḡ, tenna “Mařa kenniw tettwařam belli necc d tařdiqt yar Arebbi, iwa araḥem-d, qqimem di taddart inu.” Tuḡa tzawg aneḡ *ĥima ad neqbeř*.

### ***Bulus d Sila di řeḥbes***

<sup>16</sup>Am neggur yar wemcan n tzaḡit, temmseřqa akidney ict n tayya, dayes řaryah n tgezzant, tiwi-d ij n řeřdeř imyar i aytbab nnes s tgezzant nni. <sup>17</sup>Nettat tebda tḡeffar Bulus d neccin, tesyuyyu, teqqar “iwdan-a d imsemyan n Arebbi i ieuḡen x marra min iḡan, ttbarrḥen awem s webrid n usenjem.” <sup>18</sup>Ammu i teqqim ařas n wussan. Maca Bulus, umi tuḡa ittxeyyaq x man aya, inneqřeb, inna i řaryah “Ttumureḡ cek s yisem n Yeccu Lmasiḥ, ffey zzayes.” Uca iffeḡ-d di tsæeet nni. <sup>19</sup>Umi zřin aytbab belli asitem n řeřdeř nsen iruḥ, tḡfen Bulus d Silas, jarren ten yar ssuq zzat i řḥukkam.

<sup>20</sup>Ařami ten iwyeŋ ƣar imeqqranen, nnan “Iwdan-a ttxarwađen tandint nney, minzi nitni d Udayen <sup>21</sup>uca sşyaran ttaqalid tinni i war iheğřen i Irumaniyyen am neccin mağend ad tent neqbeř.”

<sup>22</sup>Uca idduqgez-d xasen řyaci uca imeqqranen carrgen xasen arruđ x arrimet, umuren ad ten hettken s urekkuđ. <sup>23</sup>Awarni řami ten wtin ařtas, nđaren ten di řeğbes, umuren i uessas n řeğbes ģima ad xasen iess mliğ. <sup>24</sup>U netta, umi iksi tewşeyyet-a, inđar iten ƣar daxeř qae n řeğbes, iqgen iten zeg iđaren nsen deg ij n řqařeb n ģuğ ģima war ttrikkwiřen.

<sup>25</sup>Ařami d yiweđ wezyen n ģiřet, tuƣa Bulus d Silas ttzağan, tsebbħen Arebbi s izřan uca imeğbas sřin asen. <sup>26</sup>Řexdenni imsar ij n wenhezzi n tmurt d ameqqran ařami itwanhezzi dsas n řeğbes, xenni marra tiwwura nnurzment uca twafsyen iceddiyyen n marra.

<sup>27</sup>Řami d ifaq uessas n řeğbes, izra tiwwura arzment, ijbed ssif nnes, tuƣa iggur ad iney ixef nnes, ittyiř as belli imeğbas arewřen.

<sup>28</sup>Maca Bulus iřaya s tmijja ijehden “War ttđarra ixef nnek, aqqa-ney da marra.” <sup>29</sup>Aessas n řeğbes ittar tifawt uca ingez ƣar daxeř, xenni inđar ixef nnes ƣar iđaren n Bulus d Silas, ittarjiji ařtas.

<sup>30</sup>Issuffey iten-d ƣar barra, inna “A řejwad, min ittxeşş ad ggey ģima ad twassnejmey?” <sup>31</sup>Nitni nnan as “Amen zi Yeccu Lmasiğ, ad tetwassnejmed, cek d řeğbab n taddart nnek.” <sup>32</sup>Ssiwřen akis awař n Arebbi uca ak-d marra inni iğan di taddart nnes. <sup>33</sup>Di tsaeet nni n ģiřet iwyi ten-d ƣares, issird asen iyezzimen nsen. Xenni itwasseyđeş deg wemcan ak-d marra řeğbab nnes. <sup>34</sup>Xenni iwyi ten ƣar taddart nnes, issewjed asen ttabřa, ifarğ minzi yumen di Arebbi, netta d marra taddart nnes.

<sup>35</sup>Umi d yiweđ uziř, ssekken imeqqranen n tendint iessasen ģima ad inin “Đeřq asen-d i iwdan nni.” <sup>36</sup>Aessas n řeğbes issiweđ awařen-a ƣar Bulus, inna “Imeqqranen n tendint ssekken-d ģima ad awem đeřqen. X uyenni ffyem řexxu uca truğem di řehna.” <sup>37</sup>Maca Bulus inna asen “Nitni jjin ad aney hettken s urekkuđ qibač i iwdan, nđaren aney di řeğbes, waxxa neccin d Irumaniyyen, nnebřa mma ad xaney ģekmen uca řexxu xsen nitni ad aney s suffyen s tnuffra? Lla, ejj iten ad d asen nitni s yixef nsen, ģima ad aney ssuffyen.”

<sup>38</sup>Iessasen ssiwđen awařen-a eawed ƣar imeqqranen u nitni ggweden umi sřin aqqa-ten d Irumaniyyen. <sup>39</sup>Uca usin-d, ttaren

zzaysen *smahet* u awarni řami ten ssuffyen, ttaren zzaysen ad ffyen zi tendint. <sup>40</sup>Xenni ffyen-d zi řehbes uca udfen ġar taddart n Ludiya u řami žrin tawmat, sscejjeen ten uca uyuren.

### ***Bulus di Tisalunki***

**17** <sup>1</sup>Umi zwan x Amfibulis d Abulluniya, iwđen ġar Tissalunika mani tuġa ij n usinagug n Wudayen. <sup>2</sup>Bulus, yudef-d din ġarsen am lqaēida uca inaġec akisen zeg idlisen iqeddsen třata n wussan n ssebt, <sup>3</sup>iffessar *asen* s usbeyyen belli tuġa ittxeřř i Lmasih ad itwaweddeb uca ad d ikkar zeg imettinen. Inna *asen* “Aqqa Yeccu wanita d Lmasih wenni i d awem barrħey.” <sup>4</sup>Ca zzaysen umnen, munen ak-d Bulus d Silas, uřa d ij n řġaci d ameqqran zeg Iyunaniyyen inni iēbbden Arebbi uřa d timġarin iceneen war iġi drust zzaysent, munen akisen. <sup>5</sup>Maca Udayen inni tuġa war itřieen, nedhen ca n yeryazen iēffanen zi tarwa n řexřa, ssgaēden ij n řġaci, sshajan tandint uca dextřen di taddart n Yasun, arzun ad ten ġewwden zzat i iwdan. <sup>6</sup>Umi war ten ufin, jarren Yasun d ca n wawmaten qibač i imeqqranen n tendint, řuyuyun “Ina inni issġewwġyen ddunnit marra, aqqa usin-d ēawed da <sup>7</sup>uca Yasun issidef iten ġares. U nitni marra tteekksen tiwřeyyat n qayřar, qqaren aqqa da ajeġid nneđni, aqqa-t d Yeccu.” <sup>8</sup>Ssarejfen řġaci d imeqqranen n tendint. <sup>9</sup>Maca awarni řami třfen řēarbun zi Yasun d yinneđni, arxun asen.

### ***Bulus d Sila di tendint n Biriya***

<sup>10</sup>Řexdenni ssekken tawmat Bulus d Silas ġar Biriya s ġiřet. Umi din iwđen, ruħen ġar usinagug n Wudayen. <sup>11</sup>Ina tuġa-ten xar zeg inni i iġan di Tissalunika uca qebřen awař s marra řxađar, arezzun kuř ass deg idlisen iqeddsen ħima ad xzaren di timesřayin-a ma aqqa-yent amenni. <sup>12</sup>Ařřas zzaysen *zeg Wudayen nni* umnen uřa d timġarin d yeryazen Iyunaniyyen maci drust waha. <sup>13</sup>Maca, umi Udayen n Tissalunika ssnen belli Bulus tuġa ittbarreħ awař n Arebbi ēawed di Biriya, usin-d nitni ēawed din maħend ad ssġewwġyen řġaci. <sup>14</sup>Ssekken wawmaten Bulus řexdenni ġar řebħar, maca Silas d Timutiyyu qqimen din. <sup>15</sup>Inni issqebđen Bulus iwyen t ġar Atina. Xenni, umi třfen tawřeyyet zi Silas d Timutiyyu maħend nitni ad ġares-d asen deyya, ffyen ssenni.

### ***Bulus di tendint n Atina***

<sup>16</sup>Am ten tuya ittraja Bulus di Atina, tuya arruḥ nnes ixeyyeq umi izra tandint teccur s lašnam. <sup>17</sup>X uyenni tuya ittemnaqac deg usinagug ak-d Wudayen uḥa ak-d inni itteggweden Arebbi uḥa di ssuq kuḥ ass ak-d inni i tuya ittaf dinni. <sup>18</sup>Ca n yinni zeg Ibikuriyyen u ca n yinni zi Stuwika mmnaqacen akis. Ca zẓaysen nnan “Min ixs ad yini wanita s řḥarḍ-a qaε?” Maca innedni nnan “Iḍhar-d aqqa-t d ambarreḥ n ccwaṭen iyriben, minzi tuya ittbarreḥ asen s Yeccu uḥa s tnukra zeg *imettinen*. <sup>19</sup>Uca iwyyen t, nedhen řar ij n wemcan qqaren as Ariyubagus, nnan “Ma nzemmar ad nessen man tařuri n jdid i xef tessawařed?” <sup>20</sup>Minzi cek tiwyed ca n tmesřayin d tiyribin i imezzuyen nney. Neccin nessitim ad nessen min ixs ad yini man aya.” <sup>21</sup>Marra inni zi Atina d marra ibarraniyyen inni i din iqqimen, sseedun řweqt myir řima ad xebbaren u řima ad sřen ict n řḥajet n jdid.

<sup>22</sup>Ikkar-d Bulus, ibedd di řwest ř Ariyubagus, inna “A iryazen n Atina, ufiy belli kenniw tceyřem di tmesřayin n ddiin zi kuḥ ayezdis. <sup>23</sup>Minzi umi nndey di tendint nwem, řriy řeḥwayec n uebad nwem, ufiy εawed ij n uealřar tzezzemmem xas ‘I Arebbi i war itwassnen.’ X uyenni wenni umi ttebbdem kenniw, am war t tessinem ca, d wa i zi d awem ttbarreḥ. <sup>24</sup>Arebbi wenni d yejjin ddunnit d marra min dayes, wenni iřan d Sidi n ujenna d tmurt, war izeddey ca di zzawec (=tudrin) i itwaggen s ifassen n *iwdan*, <sup>25</sup>uḥa war xas itwasexxar s ifassen n iwdan axmi netta iḥwaj ca, minzi netta simant nnes iwca tudart d nnefs uḥa d kuḥci i marra. <sup>26</sup>Zeg idammen n yijjen igga marra řegnus n bnađem řima ad zedyen x wudem n tmurt marra u netta iḥedd asen ikuden n řweqt d iymiren n tzeddiy t nsen. <sup>27</sup>řima ad arzun x Arebbi, attay am ttnubucen ad t afen, waxxa netta war iggwij ca aṭas x kuḥ ijjen zzayney. <sup>28</sup>Minzi neccin dayes i neddar u nettenhezza, am mammec nnan ca n imedyazen nwem ‘Aqqa neccin εawed d dduriyet nnes.’ <sup>29</sup>X uyenni, am neřa d dduriyet n Arebbi, ittxeřř war nḥesseb ca belli Arebbi amecnaw urey d nnuqart uḥa d ařru i itwaggen s lfenn u zeg uxarrař n bnađem. <sup>30</sup>Arebbi xenni, umi isseedu tiṭṭawin nnes x ikuden n řweqt n tqubbanect, ittbarreḥ řexxu i marra iwdan di marra imucan řima ad tuben, <sup>31</sup>minzi netta igga ij n wass i di i řa iḥkem x tmurt s řḥeqq s ij n bnađem i tuya

ixđar uca issbeyen it i marra umi t-id issnekkar zeg imettinen. <sup>32</sup>Umi sřin x tnukra n imettinen, stehzan s man aya ca zwaysen, maca innedni nnan “Neccin ad zzayek nseř ict n twařa nneđni x man aya.” <sup>33</sup>Ammu iffeř Bulus zi řwestř nsen. <sup>34</sup>Ca n yeryazen đfaren t, umnen. Jarasen Diyunisiiyus, wenni iqqimen x Ariyubagus, d ict n temřart qqaren as Damaris u innedni akidsen.

### *Bulus di tendint n Kurintus*

**18** <sup>1</sup>Awarni man aya iija Bulus tandint n Atina, yusi-d řar Kurintus. <sup>2</sup>Yufa *din* ij n Wuday qqaren as Akwila, ixřeq di Bunři, yusi-d drus zeg wami zi İřalya, netta d temřart nnes umi qqaren Briskilla, minzi *qayřar* Kludiiyus tuřa yumar mařend marra Udayen ad ffyen zi Ruma. Uca yusi-d řarsen netta. <sup>3</sup>Umi tuřa řarsen řřenet d icten, iqqim ixeddem akidsen, minzi nitni tuřa-ten di řřenet nsen d imeicwen tteggem iqiđan. <sup>4</sup>Tuřa itředdat kuř ssebt deg usinagug, yarezzu ad isseqneē Udayen d İyunaniyyen mařend ad amnen. <sup>5</sup>Umi d ihwa Silas d Timutiyyu zi Masiduniya, tuřa Bulus itwaeřaren zi Arruř mařend ad isseqneē Udayen, belli aqqa Yeccu netta d Lmasiř. <sup>6</sup>Maca umi tuřa nitni ttđaddan t uca ttceqqfen *dayes*, izerz arruđ nnes, inna asen “İdammen nwem ad iřin x izeřifen nwem. Necc ttbariř ixef inu zzaywem. Zi řexxu d tsawent ad rařeř řar ibarraniyyen.” <sup>7</sup>Iruř ssenni uca yusi-d řar taddart n ij n weryaz qqaren as Yustus wenni tuřa iēbbden Arebbi. Tuřa taddart nnes teřseq ak-d usinagug. <sup>8</sup>U Krisbu, ameqqran x usinagug, yumen di Sidi ak-d marra řeřbab n taddart nnes uca ařas n İkurintiyyen umi sřin, umnen, twassyeđřen. <sup>9</sup>Inna Arebbi i Bulus deg ij n řewřiy s řiřet “War tteggwed, siweř, war ttseqqara, <sup>10</sup>minzi necc akik uca uřa d ijj war cek itřđidi s ufus řima ad cek iđarr, minzi řari ařas n iwdan di tendint-a.” <sup>11</sup>Uca iqqim din ijj n useggwas d setta n iyuren, isseřmad asen awař n Arebbi.

### *Bulus ztat i Yaliyun*

<sup>12</sup>Maca umi tuřa Yaliyun lwali x Axaya, kkaren Wudayen am ijj n weryaz x Bulus uca iwyyen t-id řar řkursi n ccraē, <sup>13</sup>nnan “wa isseqnaē iwdan mařend ad ēbden Arebbi s řēeks n ttawrat.” <sup>14</sup>Umi tuřa Bulus iggur ad yarzem aqemmm nnes, inna Yaliyun

i Wudayen “Mařa din ij n ufturi niy ict n ljarima, a Udayen, iři ad kenniw qebřex s řřeqq. <sup>15</sup>Maca mařa din ixarwiđen di ssibbet n ij n wawař niy d ca n ismawen niy di *ssibbet n ttawrat* i iğan jarawem, ħđam t kenniw s yixef nwem, minzi necc war xsey ad iři y d řqađi x tmesřayin-a.” <sup>16</sup>Uca yuzzeř xasen zi řkursi n ccrae. <sup>17</sup>Řexdenni tťfen marra Iyunaniyyen Sustinis, ameqqran n usinagug, marrħen t qibač i řkursi n ccrae. Yaliyun war d as icqi man aya qae.

### ***Bulus ieqeb-d ħar Antiyuxiya***

<sup>18</sup>Awarni řami iqqim Bulus din ead aťtas n wussan, iweddee tawmat uca ibeħħar ssenni ħar Suriya ak-d Briskilla d Akwila, awarni řami iħeff azeğif nnes di Kinxriya, minzi tuħa xas ij n řwaed. <sup>19</sup>Iwđen ħar Afasus uca ijj iten din, maca netta yudef ħar usinagug, tuħa ittħeddat Udayen. <sup>20</sup>Řami zzayes ttaren ad kisen iqqim ktar, yugi. <sup>21</sup>Xenni iweddee iten, inna “Ittxeřř ad eeyydey řeid i d ħa yasen ikmeř di Urcalim. Maca ad ħarwem-d eeqbey eawed mařa ixš Arebbi. Uca iruħ di řebħar zi Afasus. <sup>22</sup>Ařami d yiweđ ħar Qayřariya, igaeed ħar *Urcalim*, iseğem x tmesmunt, xenni ihwa ħar Antiyuxiya.

### ***Asafar wiss třata n Bulus i tbarreħt n řexbar ařebħan***

<sup>23</sup>Ařami din isseedu ca n řweqt, iffey uca icuqq di tmurt n Galaťiya d Frixiya, issemħeđ imeħđaren marra. <sup>24</sup>Xenni yiweđ-d ij n Wuday ħar Afasus, qqaren as Abullus, ixřeq di Iskandariya, aryaz issen ad issiweř, ittħaka deg idlisen iqeddsen. <sup>25</sup>Wa tuħa itwasseřmed deg webrid n Sidi, tuħa-t s arruħ imeħħđen, issawař u isseřmad timesřayin n Sidi s cđaret, am war issin myir aseħđas n Yuħanna. <sup>26</sup>Ibda issawař s teryast deg usinagug. Řami d as sřin Akwila d Briskilla, ksin t ħarsen uca ssefmen as abrid n Arebbi nican. <sup>27</sup>Ařami tuħa ixš netta ad isafar ħar Axaya, cejjeen t wawmaten, urin ħar imeħđaren ad t qebřen. Umi d yiweđ wa ħar din, ieawen aťtas n imeħđaren inni tuħa yumnen zi nniemet. <sup>28</sup>Minzi netta tuħa isseqnae Udayen s bťayťay s waťtas n jjeħd, issbeyyen asen zeg idlisen belli Yeccu netta d Lmasiħ.

### *Bulus di tendint n Afasus*

**19**<sup>1</sup>Řami tuya Abullus di Kurintus, aqqa yiweđ-d Bulus, awarni řami icuqq di jwayeh yučřan, řar Afasus uca yufa din ca n imehđaren. <sup>2</sup>Inna asen “Ma tqebřem Arruř Iqeddsen řami tunnem?” Maca nitni arrin-d xas “War nesři qač belli din Arruř Iqeddsen.” <sup>3</sup>Inna asen “Xenni min zi tetwassyeđsem?” Nnan as “S useyđas n Yuřanna.” <sup>4</sup>Bulus inna “Tuya Yuřanna isseyđas s useyđas n ttubet, iqqar i iwdan ad amnen s wenni i d řa yasen awarni as, aqqa netta d Lmasih Yeccu.” <sup>5</sup>Umi sřin aya, twassyeđšen deg yisem n Sidi Yeccu. <sup>6</sup>Awarni řami xasen issars Bulus ifassen, ihwa-d xasen Arruř Iqeddsen uca bdan ad ssiwřen s yiřsawen uca *bdan* ttkacafen. <sup>7</sup>Tuya-ten qač eřařař teneac n yeryazen. <sup>8</sup>Yudef *Bulus* řar usinagug, issawař akidsen teřt n iyuren s teryast, itthęddat uca isseqnae iten di min itthemman tageldit n Arebbi. <sup>9</sup>Maca řami dewřen ca zzaysen qeřšen, war řřien, ceqqfen deg webrid n Arebbi zzat i řřaci, xenni iggwej xasen uca issbeeed xasen imehđaren, ibda itthęddat kuř ass di temzida n ij n weryaz qqaren as Tirannus. <sup>10</sup>Ammu i yegga tnayen n iseggwusa ařami marra inni tuya izeddyen di Asiya, sřin awař n Sidi Yeccu, Udayen d Iyunaniyyen s tnayen.

### *Tarwa n Skiwa ameqqran n ikehhanen*

<sup>11</sup>Tuya Arebbi ittegg řečjayeb d timeqqranin s ifassen n Bulus, <sup>12</sup>ařami ksin řemřamat d westawen n ibuyas i iřan x arrimet nnes řar imehřac uca ruřen xasen řehřacat u řaryařat imengas ffyen zzaysen. <sup>13</sup>Ca n Wudayen inni tuya igguren di tmurt uca tuya ssuffuyen ccwařen, zeemen ad řayan s yisem n Sidi Yeccu x inni i di ięa řaryařat izeffanen, qqaren “Neccin nejjaę xak s Yeccu i zi ittbarreř Bulus.” <sup>14</sup>Inni t iggin, aqqa nitni sebea n tarwa n Skiwa, ij n umeqqran n ikehhanen d Uday. <sup>15</sup>Maca řaryař ačeffan yarr-d, inna “Yeccu ssney t uřa d Bulus, maca min teenam kenniw?” <sup>16</sup>Uca bnađem i di ięa řaryař d ačeffan ingez xasen, iyeřb iten uca ijhed xasen ařami arewřen zi taddart d ičaryanen d iyezmen. <sup>17</sup>Řexbar-a iffey řar marra inni izeddyen di Afasus, řar Wudayen u řar Iyunaniyyen s tnayen. Tewđa-d ict n tiggwudi temřar x marra *iwdan* uca itwassemřar isem n Sidi Yeccu. <sup>18</sup>Ařřas n inni yumnen usin-d, neemen s min tuya ttegggen. <sup>19</sup>Ařřas n inni i tuya

d isehħaren, yarwen idlisen, sscemmađen ten zzat i marra. Nitni ggin asen řehšab uca ufin belli ssekkwan xemsa ařaf n řwuzenat n nnuqart. <sup>20</sup>Ammu tuća awař n Arebbi iggam, yarenni di jjeħd.

### *Axarweđ di Afasus*

<sup>21</sup>Ařami kemmřent tmesřayin-a, igga Bulus s Arruħ, awarni řami icuqq di Masiduniya d Axaya, ĥima ad isafar ĥar Urcalim, inna “Xmi din i ĥa reħħgey, ittxeřř ayi ad zarey Ruma eawed.” <sup>22</sup>Awarni řami issekk tnayen n inni tuća ixeddmen akis ĥar Masiduniya, ina d Timutiyu d Irastus, tuća netta simant nnes iqqim din ead ca n řweqt di Asiya.

<sup>23</sup>Di řweqt nni ikkar din ij n uxarweđ war iĝi drust x ssibbet n webrid n Sidi. <sup>24</sup>Minzi ij n usiyay n nnuqart, qqaren as Dimitriyu, wenni tuća ittšennae zzawect n Artimis di řeqwařeb imezyanen, yarbeħ s ššenet nni ij n arbeħ war iĝi drust. <sup>25</sup>Issmun x inni ixeddmen am netta di ššenet nni, inna asen “A iryazen, kenniw tessnem belli neddar mliħ zi ssibbet n ššenet-a. <sup>26</sup>Kenniw tesřim u tessnem belli Bulus wanita isseqnae ařtas n iwdan, war iĝi inni zi Afasus waha, maca uřa d inni zi marra Asiya eřaħař, issbeeed iten, iqqar belli irebbiten i itwaggen s ifassen war ĝin ca d irebbiten. <sup>27</sup>War iĝi d neccin waha inni iĝan di lxařar ařami ššenet-a ad tweddar, maca uřa d zzawect n Artimis tarebbit tameqqrant ad tt ĥesben d walu uca iggur ad itwareddeĝ řeezz nnes i teebbed marra Asiya d marra ddunnit.” <sup>28</sup>Umi tt sřin, dewřen xeyqqen ařtas, bdan syuyyun “Tameqqrant d nettat, Artimis n Ifasusiyen!” <sup>29</sup>Tandint qae txarweđ amen tekmeř uca ruħen ĥar lmesraħ, jarren akisen Xayus d Aristarxus zi Masiduniya, inni d imeacaren n Bulus deg usafar nnes. <sup>30</sup>Umi ixš Bulus ad yadef jar iwdan, war t jjin imeħđaren. <sup>31</sup>Uřa d ca n imeqqranen zi jwayeh n Asiya tuća-ten d imeddukař nnes, ttaren zzayes ĥima war isscin ixef nnes di lmesraħ. <sup>32</sup>Nitni syuyen, iijen ammu wennedni ammu, minzi tuća din ij n uxarweđ deg wagrau uca azyen ameqqran zzayes war issin mixef tuća munen.

<sup>33</sup>Řřaci igga Alikšandir ĥar zzat, tuća Udayen earrnen t ĥar zzat uca Alikšandir iceyyar s ufuš, tuća ixš ad issiweř x udafee i iwdan.

<sup>34</sup>Maca umi fehmen belli aqqa-t d Uday, syuyen marra s tmijja d icten eřaħař tnayen n tsaeetin “Tameqqrant d nettat, Artimis n

Ifasusiyen!”<sup>35</sup>Xenni aktatbi n tendint isshedden řyaci, inna “A iryazen n Afasus, man wen war issinen belli tandint n Ifasusiyen tħetħa x zzawect n Artemis u x řexyař i d iwđan zeg ujenna!”<sup>36</sup>X uyenni, umi war iseddeř ad twaeekksent timesřayin-a, icuwwar awem ad tarsem, war tteggem ca s uqeğeq,<sup>37</sup>minzi tusim-d da s tnayen-a n yeryazen inni war iğin d iceffaren n zzawect uřa řa d nitni war tteqqafen di trebbit nney.<sup>38</sup>Mařa tuřa řar Dimitriyu u řar inni iğan akis di řšenet ca n ucetci x yijjen, aqqa din řfusinat uřa d lwaliyyat, ejj iten ad cetcan x wayawya *din*.<sup>39</sup>Uca mařa din řarwem ca n ucetci nneđni, ad dayes ixzar wagraw n ccae *n řgens*.<sup>40</sup>Minzi aqqa-ney di lxatar, ad xaney ħekmen ass-a s uřuwwey, minzi war din bu řesbab i zi nzemmar ad d narr s ij n wawař di tmesřact n uxorweđ-a.”<sup>41</sup>Umi inna aya, ismeħ i wagraw ad yuyur.

### ***Bulus di Masiduniya d Lyunan***

**20**<sup>1</sup>Awarni řami isshedden netta axarweđ, iřaya Bulus x imeħđaren, iweddeē iten, iffey ħima ad irah řar Masiduniya.<sup>2</sup>Umi icuqq di jwayeh nni, igga daysen taryast s wařtas n wawařen, xenni yiweđ řar Lyunan.<sup>3</sup>Ařami isseedu din třata n iyuren, ssewjden as Wudayen ict n texceft umi tuřa iggur ad ibeħħar řar Suriya. Xenni igga ad yeēqeb x webrid n Masiduniya.<sup>4</sup>D yina d imeacaren nnes ař Asiya: Subatrus zi Biriya, Aristarxus zi Tissalunika, Xayus zi Dirbi d Timutiya uca xenni Ticikus d Trufimus zi Asiya.<sup>5</sup>Ina izwaren aney, ttrajan di Truwas.<sup>6</sup>Maca neccin nbeħħar zi Filibbi awarni řami kemmřen wussan n řeid n weyrum nnebřa antun uca nekka xemsa n wussan ařami d niweđ řarsen řar Truwas mani neqqim seba n wussan.

### ***Asnekkar n Utixus zi řmewt di Truwas***

<sup>7</sup>Deg wass amezwaru n simana umi munen imeħđaren maħend ad arzen ařrum, issiweř Bulus akisen uca iqqim isszugar di řħarđ nnes ař řweř n ħiřet waxxa netta tuřa inwa ad isafar tiwecca nnes.<sup>8</sup>Aqqa din ařtas n řefnarat di tyurfet i di tuřa munen sennej.<sup>9</sup>Tuřa din ij n ubřiř qqaren as Utixus, iqqim di řkazi, řxdenni ikka xas yiđeř yuğey am tuřa Bulus isszugar di řħarđ nnes ammu, xenni iwđa-d zi tħebqet wiss třata řar wadday, ksin t immut.<sup>10</sup>Maca

Bulus ihwa, iwða xas, idare as, inna asen “War tennexřisem ca aqqa dayes ead řeemar.” <sup>11</sup>Netta yuři eawed, yarza aȳrum uca icca, xenni issiweř akidsen ead ařtas ařami d řefjar u ammu iffeȳ. <sup>12</sup>Nitni iwyen-d ařenjir iddar uca dewřen twacejjeen war iȳi drust waha. <sup>13</sup>Maca neccin nizwar ȳar uȳarrabu, nbeřřar ȳar Assus mařen ad kidney-d nawi Bulus ssenni am mammec tuȳa ittdebbar netta, mařen netta s yixef nnes iewweř ad iruř x idaren. <sup>14</sup>Ařami xaney-d ireřřeg di Assus, neksi t uca nruř ȳar Mitilini. <sup>15</sup>Ssenni nkemmeř asafar, niweđ tiwecca nnes ȳar Xiyus u farwecca nnes neȳwa ȳar Samus, neqqim di Truxiliyun uca deg wass i d yusin niweđ ȳar Militus, <sup>16</sup>minzi Bulus igga ad iedu Afasus x řebřar řima war ittetař di Asiya, minzi tuȳa ittqegeř řima, maelik ieddeř, iři yiweđ ȳar Urcalim deg wass n Xemsin.

***Ameřqi aneggaru n Bulus ak-d imȳaren n tmesmunt n Afasus***

<sup>17</sup>Maca zi Militus issekk ȳar Afasus, iřaȳa-d x imȳaren n tmesmunt. <sup>18</sup>Řami d usin ȳares inna asen “Kenniw tessnem zeg wass amezwaru umi d udfey ȳar Asiya, mammec d ayi tuȳa řami kiwem qqimeȳ marra ussan, <sup>19</sup>xedmeȳ i Arebbi s marra awadee u s wařtas n imeřřawen u deg ijarriben i xafi ikkin zi ssibbet n timeemač n Wudayen. <sup>20</sup>Necc war jjiȳ ca zi min inefeen war d awem t barrřey u war t ssremdeȳ s bȳaȳay uřa di marra tudrin, <sup>21</sup>ssqeneȳ Udayen d Iyunaniyyen s tnayen mařen ad tuben ȳar Arebbi, ad amnen di Siditney Yeccu Lmasiř. <sup>22</sup>Řexxu ad rařey ȳar Urcalim, twacarfey zi Arruř, war ssineȳ min d ayi ittrajan din, <sup>23</sup>myir Arruř Iqeddsen iched ayi zi tendint ȳar tendint, iqqar, aqqa iceddiyyen d řeřřart ttrajan ayi. <sup>24</sup>Maca necc řessbey ixef inu d walu uřa d tudart inu war tt řessbey ca tiȳra i yixef inu, mařen ad kemmřey ticři inu s řefrařet uca ad kemmřey řxedmet n tsexxart i ksiȳ zi Sidi Yeccu řima ad cehdeȳ x řexbar ařebřan n nniemet n Arebbi. <sup>25</sup>U řexxu xȳar, necc ssney aqqa kenniw marra, inni ak uyureȳ jarawem am ttbarrřey s tgeldit n Arebbi, war tȳarrem aȳembub inu ead. <sup>26</sup>X uyenni ad xawem cehdeȳ ass-a, belli necc ttbarriȳ ixef inu zeg idammen nwem marra. <sup>27</sup>minzi war egizeȳ ad awem barrřey marra cwar n Arebbi. <sup>28</sup>X uyenni řdam ixef nwem d řimart tmun x min xef kenniw igga Arruř Iqeddsen d imeřřayen, řima ad tarwesem

tamesmunt n Arebbi tenni d ikesseb s idammen nnes.<sup>29</sup>Minzi ssney aya, belli awarni twaḥit inu, ad ɣarwem-d adfen wuccanen imuzzaren inni war ittejjin x tḥimart<sup>30</sup>uca ad zɣaywem-d kkaren iwɗan inni i ɣa issiwřen řḥard iɛewwjen ḥima ad jarren awarni asen imeḥḍaren.<sup>31</sup>X uyenni faqem, teeqrem belli tṛata n iseggwusa ġiřet d wass war beddeɣ ad ssmehḥdeɣ kuř ijjen zɣaywem weḥdes s imetṭawen.<sup>32</sup>U řexxu, a awmaten, ad kenniw sellmey i Arebbi u i wawař n nniemet nnes, i wenni ɣar iġa tizemmar ḥima ad ibna u ḥima ad awem iwc řwart jar marra inni itwaqeddsen.<sup>33</sup>War đmieey di nnuqart niy deg wureɣ niy deg warruḍ uřa zeg ijjen.<sup>34</sup>Kenniw tessnem simant nwem, belli ifassen-a aqqa xedmen i min ḥwajey u i min ḥwajen inni iġan akidi.<sup>35</sup>Di kuřci ssecney awem belli ittxeř, am nxeddem ammu, ad newc afus i inni iḍeefen uca ad nfekkar deg wawařen n Sidi Yeccu, belli inna ‘Sseed n wenni iwcin x wenni iksin.’”<sup>36</sup>Awarni řami inna aya, iwḍa x ifadden nnes uca izzuġ akidsen marra.<sup>37</sup>Marra nitni run aṭṭas uca dareen i yiri n Bulus, ssudmen t.<sup>38</sup>Ffugmen aṭṭas, amezwar n marra x wawař i inna, belli war ɣarren ca ayembub nnes ead uca ssqebḍen t ɣar uyarrabu.

### *Twaḥit ɣar Urcalim*

**21**<sup>1</sup>Awarni řami xasen nemmsebḍa, nebda nzekkwa řebḥar, nruḥ nican uca niweḍ ɣar Kus. Tiwecca nnes niweḍ ɣar Rudus u ssenni ɣar Batara.<sup>2</sup>Ařami nufa ij n uyarrabu i tuɣa izekkwaw ɣar Finiqiya, nenyā dayes uca nruḥ.<sup>3</sup>Řami neɣra Qubrus, nejji t x uzeřmaḍ uca nruḥ x řebḥar ɣar Suriya uca niweḍ ɣar Tirus minzi aɣarrabu tuɣa igga ad ifarrey sseřet nnes din.<sup>4</sup>Nufa imeḥḍaren uca neqqim din seba n wussan. Nnan nitni s Arruḥ i Bulus maḥend war ittgaæeid ca ɣar Urcalim.<sup>5</sup>Řami nesseedu ussan-a *din*, neffey uca nkemmeř x usafar. Nitni ssqebḍen aney ak-d temɣarin d iḥenjiren *nse*n ař barra n tendint. X tma *n řebḥar* newḍa x ifadden nney uca nezzuġ.<sup>6</sup>Umi nweddeē ayawya, nenyā deg uyarrabu, maca nitni eqben eawed kuř ijjen ɣar řwacun nnes.<sup>7</sup>Umi nkemmeř x usafar zi Tirus, niweḍ ɣar Btulumayu, nseġmen x wawmaten uca neqqim akidsen ijj n wass.<sup>8</sup>Tiwecca nnes, Bulus d neccin inni kis iġan, neffey ssenni, niweḍ ɣar Qayřariya. Nudef ɣar taddart n Filibbus, ambeccar wenni tuɣa d ijjen zi ‘seba’ uca neqqim ɣares.<sup>9</sup>Tuɣa ɣar wa areba

n tħenjirin, řad d tieezriyyin, tinni ttkacafent *awař n Arebbi*.<sup>10</sup>Umi nenniwjew din ařtas n wussan, ihwa-d ij n umkacaf zi Yahudiyya, qqaren as Agabus.<sup>11</sup>Netta yusi-d ħarney uca iksi abyas n Bulus, icarf ixef nnes ifassen d iđaren, inna “Ammu iqqar Arruħ Iqeddsen ‘Aryaz i ħar iġa abyas-a, ammu i t ħa carfen Wudayen di Urcalim uca ad t sellmen i řegnus.’”<sup>12</sup>Umi nesřa aya, nettar zzayes zi *Bulus*, neccin d yinni zeg wemcan nni, ħima war ittgaæeid ħar Urcalim.<sup>13</sup>Maca Bulus yarr-d “Min kenniw yuyin, tettrum uca tessaredċbem uř inu? Minzi aqqa-yi wejdeħ maci ħima ad ayi carfen waha, maca eawed ħima ad mteħ di Urcalim x ssibbet n yisem n Sidi Yeccu.”<sup>14</sup>Umi war d aney iġi ad t nesseqnee, nesqar, neqqar “Ad yiři min ixs Arebbi.”<sup>15</sup>Awarni ussan nni nessewjed uca ngaæeed ħar Urcalim.<sup>16</sup>Ruħen akidney ca n imeħđaren zi Qayřariya, iwyen-d ijjen qqaren as Mnasun zi Qubrus, aqqa-t d ij n umeħđar zeg umezwaru, ħima ad ħares nenniwjew.

### ***Bulus immerħa ak-d imazanen d wawmaten di Urcalim***

<sup>17</sup>Ařami niweđ ħar Urcalim, tareħħeb zzayneħ tawmat s řefraħet.  
<sup>18</sup>Tiwecca nnes yudef Bulus akidney ħar Yaæqub uca ħđaren din marra imħaren.<sup>19</sup>Iseġem xasen, xenni ibda itteawad nican x marra min igga Arebbi jar řegnus s tsexxart nnes.<sup>20</sup>Umi sřin aya, ssemyaren Arebbi, nnan as “A tawmat, tettwařid meħař n řuřuf n Wudayen i yumnen u nitni marra ttasmen x ttawrat.<sup>21</sup>Aqqa yiweđ asen-d řexbar xak belli tessesřmaded i Wudayen maħend ad semħen di Musa am d asen teqqared war xettnen iħenjiren war gguren deg webrid n ttawrat.<sup>22</sup>Min i ħa negg xenni? Labudda ad imun wagraw minzi ad sřen belli aqqa tusid-d.<sup>23</sup>Egg min d ac i ħa nini “Ĥarney arebea n yeryazen inni ħar iġa ij n řwaed.<sup>24</sup>Ksi ina akik, tqeddsed ixef nnek akisen, ad xasen txeġřsed ħima ad ħeffen izeġifen nsen ħima marra ad issen belli war iġi bu nican min xak itwannan, maca uřa d cek teggured ad tetřfed di ttawrat.<sup>25</sup>Maca zi jjiħet n řegnus, aqqa nura u newca ttesriħ maħend war tetřffen di man aya, myir ad beæeden x min iqqarřen i lařnam uřa x idammen uřa x jjiyfap uřa x tuqeħbit.”  
<sup>26</sup>Xenni iksi Bulus iryazen nni uca tiwecca nnes issizdeg ixef nnes akidsen, iruħ ħar taddart iqeddsen, ixebbar belli ussan n usizdeg ad kemmřen ař i ħa tetwaqeddem tħarřt x kuř ijjen zzaysen.

### *Uđuf n Bulus di taddart iqeddsen*

<sup>27</sup>Umi iggur sebĕa n wussan ad qđan, zrin t Wudayen n Asiya di taddart iqeddsen, ssenhezzen řgens, ĥarten xas s ifassen, <sup>28</sup>syuyyun “A kenniw, a iryazen n Israyil, řawřem řar twiza! Wa d bnamem wenni isseřmaden iwdan marra đidd i weyduđ u đidd i ttawrat u đidd i wemcan-a uca issidef-d ĕawed Iyunaniyyen řar taddart iqeddsen uca issexmaj amcan iqeddsen.” <sup>29</sup>Minzi tuya izwaren akis zrin Trufimus Afasusi di tendint, ittyř asen belli Bulus issiweđ it-id řar taddart iqeddsen. <sup>30</sup>Tandint marra thaj uca iwdan dduqqzen-d, ĥarten x Bulus, jarren t barra i taddart iqeddsen, řexdenni bellĕent tiwwura. <sup>31</sup>Am arezzun nitni ad t nyen, yiweđ řexbar řar ukumandar n ubařayun, aqqa Urcalim amen tekmeř txarweđ. <sup>32</sup>Řexdenni yiwyi-d iĕeskariyyen d iqebřanen n řĕeskar *inni x meyya* uca uzzřen řarsen. Ařami zrin nitni akumandar d řĕeskar, ssbedden ad wten Bulus. <sup>33</sup>Xenni iqarreb řares ukumandar, iřřef it, yumur ad t carfen s tnayen n snaseř, isseqsa min iĕna netta d min tuya igga. <sup>34</sup>Jar řřaci aqqa din iĵen itřřaya ammu u wennedni ammu. Řami war izemmar ad t issen nican zi ssibbet n řřaraj, yumur ad t awyĕn řar lqecla. <sup>35</sup>Ařami d yiweđ řar ddruj, imsar belli iĕeskariyyen arbun t x ssbab n ddĥas ameqqran n řřaci, <sup>36</sup>minzi iwdan tuya đeffaren, syuyyun “Kksem t zeg webrid!” <sup>37</sup>Ařami gguren ad nedhen Bulus řar daxeř n lqecla, inna i ukumandar “Ma iĥiqq ayi ad ac iniy ca?” Inna as “Ma tessned tayunanit? <sup>38</sup>Ma war iġi d cek d Amiřri wenni iggin ařuwwey qbeř ussan-a, indeh akis arebea ařef n yeryazen d iqettařen řar řexřa?” <sup>39</sup>Inna Bulus “Necĕ d aryaz d Uday zi Tarsus, ict n tendint di Kilikiya i war itwissnen drust u necĕ ttarey zzayek ttesriĥ ĥima ad ssiwřey ak-d iwdan.” <sup>40</sup>Umi d as ismeĥ, ibedd Bulus x ddruj, iceyyar s ufus řar iwdan. Umi arsin qaĕ, issiweř akisen s iřes n teibranit *tutlayt n Wudayen*, iqqar ...

### *Bulus ittdafae x yixef nnes*

**22** <sup>1</sup>“A iryazen tawmat d ibabaten, sřem i min d awem i řa iniy x uđafeĕ inu.” <sup>2</sup>Umi sřin, aqqa issawař akidsen s yiřes n teibranit, qqimen sqaren ĕad ktar. Xenni inna <sup>3</sup>“Necĕ d iĵ n bnamem d Uday, xeřqey di Tarsus di Kilikiya, maca arebbiy di tendint-a, twassřemđey řar iđaren n Gamalial elahřsab tidett nican n ttawrat

n řejdud nney. Tuḡa cđareḡ x min iḡan n Arebbi am mammec teḡam kenniw marra řexxu. <sup>4</sup>Necc tuḡa cđeffareḡ abrid-a s řmewt am carrfey iryazen d temḡarin, ttselfameḡ ten ḡar řehbes, <sup>5</sup>am mammec xafi iched eawed uzeḡif n ikehhanen d marra agraw n imḡaren n řgens i zi ksiḡ tibratin i tawmat, ruḡeḡ ḡar Dimacq ḡima ad awyeḡ inni i din iḡan eawed s tcarfin ḡar Urcalim ḡima ad twaeaqben. <sup>6</sup>Imsar ayi, umi dayi tuḡa deg webrid iggur ad awḡeḡ ḡar Dimacq, řexdenni ḡar wezyen n wass tenneḡ ayi-d ict n tfawt tameqqrant zeg ujenna <sup>7</sup>uca wḡiy x tmurt, sřiy ict n tmijja, teqqar ayi ‘Cawul, Cawul, mayemmi d ayi tdarrced?’ <sup>8</sup>Arriḡ xas ‘Min teenid cek, a Sidi?’ Inna ayi ‘Necc d Yeccu Nnařiri wenni tettdarrced.’ <sup>9</sup>Inni i tuḡa iḡan akidi, řrin tifawt, ggweden maca war sřin ca i tmijja n wenni akidi issawařen. <sup>10</sup>Uca necc nniḡ as ‘Min i ḡa ggeḡ, a Sidi?’ Inna ayi ‘Kkar, traḡed ḡar Dimacq, din ad ac itwana x marra min d ac yuran ad tegged.’ <sup>11</sup>Minzi zi tissiqt n tfawt nni dewřeḡ war ttwiřiy, xenni gewwden ayi zeg ufus inni i tuḡa akidi iḡan uca *ammu* iwḡeḡ ḡar Dimacq. <sup>12</sup>Tuḡa din ij weryaz qqaren as Ananiyas ittweqqar ttawrat, tuḡa cehhden xas mliḡ marra Udayen i izedḡyen dinni. <sup>13</sup>Netta yusi-d ḡari, ibedd zzati, inna ‘A uma Cawul, xzar!’ Řexdenni di tsaeet nni dewřeḡ ttwařiy uca řriḡ t. <sup>14</sup>Inna ‘Aqqa Arebbi n řejdud nney ixḡar i cek, ḡima ad tessned min ixs netta, ad tżared amseggad uca ad tesřid tmijja nnes zeg uqemmum nnes. <sup>15</sup>Minzi cek ad as tiřid d acehhad ḡar marra iwdan s min teżrid d s min tesřid. <sup>16</sup>Iwa řexxu, mayemmi teḡḡařed ead, kkar, ejj ad cek ssyeḡřen, ad twassirden ddnub nnek s uřayi nnek x yisem n Sidi.’ <sup>17</sup>Imsar ayi awarni řami d eeqbey ḡar Urcalim uca tuḡa ttzaḡiy di taddart iqeddsen, xenni yiwi ayi řewḡiy <sup>18</sup>uca řriḡ t, inna ayi ‘Azzeř, teffyed deḡya zi Urcalim minzi war qebbřen ca chadet nnek xafi.’ <sup>19</sup>Nniḡ necc ‘A Sidi, aqqa nitni ssnen belli tuḡa ttḡebbsey inni yumnen zzayek, hettkeḡ ten s urekkuḡ deg isinagugen <sup>20</sup>u řami twassizzřen idammen n ucehhad nnek Stifanus, tuḡa beddeḡ din, arḡiy x řmewt nnes u ḡḡiy arruḡ n inni t inḡin.’ <sup>21</sup>Inna ayi ‘Ruḡ, minzi ad cek ssekkeḡ ḡar řegnus iggwejen.’ ”

<sup>22</sup>Tuḡa ttesřan as ař awař-a, xenni kkaren ssgaeeden tmijja nsen, qqaren “Kksem t zi tmurt, minzi amecnaw wa war isdiheḡ ad iddar.” <sup>23</sup>Am tuḡa řyuyyun, neḡḡaren arruḡ nsen uca zzużaran taeejjajt ḡar ujenna. <sup>24</sup>Yumur ukumandar maḡend ad t ssidfen ḡar

lqecla, ad t hettken s urekkuđ ħima ad zzayes ifhem mayemmi xas syuyyun ammu. <sup>25</sup>Umi t jebden s tħezzanin i uħettek s urekkuđ, inna Bulus i řqebťan x meyya i din ibedden “Ma iħeġeř awem ad thettkem ij n bñadem d Arumani s urekkuđ am war xas teħkimem *ead?*” <sup>26</sup>Umi isřa řqebťan x meyya man aya, iruħ ęar ukumandar, ixebbar it x man aya, inna “Min i ęa tegged? Aqqa aryaz-a d Arumani.” <sup>27</sup>Iqarreb ukumandar, inna as “Ini ayi, ma cek d Arumani?” <sup>28</sup>Yarr-d xas “Wah!” <sup>29</sup>Yarr-d xas ukumandar “Necć tťfey řħeqq-a n umezday *arumani* s tmenyat aťťas.” Bulus inna “Maca necć xeřqey-d d amezday *arumani*.” <sup>30</sup>Řexdenni, inni tuęa igguren ad t sseqsan, jġin t uca uřa d akumandar idweř iggwed, ifhem belli wenni t iġġin ad carfen, aqqa-t d Arumani. <sup>30</sup>Tiwecca nnes am tuęa ixs ad issen tidett mi xef t deřmen Wudayen, ifsi iceddiyyen *nnes* uca yumur ad ssmunen arruyas n ikehhanen d marra lmeħkama tameqqrant *n Wudayen* uca indeh-d Bulus, issbedd it zzatsen.

### ***Bulus zzat i lmeħkama tameqqrant n Wudayen***

**23** <sup>1</sup>Bulus iqqim ixezęar s tiťťawin nnes *deg inni iqqimen* di lmeħkama tameqqrant *n Wudayen*, inna “A iryazen tawmat, aqqa necć uyureę s tnefsect teřfa zzat i Arebbi ař ass-a.” <sup>2</sup>Maca azeġif n ikehhanen Ananiyas yumur inni i tuęa din akis ibedden, ad t wten ęar uqemmum. <sup>3</sup>Xenni inna as Bulus “Ad cek iwwet Arebbi, cek d řħiđ iġiywaren! Ma aqqa cek teqqimed maħend ad xafi tħekmed uca tumured ad ayi wten ęar uqemmum am txařafed ttawrat?” <sup>4</sup>Inni i tuęa kis ibedden, nnan “Ma tzawared azeġif n ikehhanen n Arebbi?” <sup>5</sup>Inna Bulus “Tuęa war ssineę, a tawmat, aqqa-t d azeġif n ikehhanen, minzi tura ‘Ameqqrant n weydud nwem war t ttzawar.’” <sup>6</sup>Umi issen Bulus, aqqa azyen zzaysen d Iřaduġiyyen u wenneđni zeg Ifarisiyyen, iřaya i lmeħkama tameqqrant *n Wudayen* “A iryazen tawmat, necć d Afarisi, mmis n Ifarisiyyen, necć ttetwahakmeę di ssibbet n usitem d tnukra n imettinen.” <sup>7</sup>Ařami inna aya, imsar ij n uxarweđ jar Ifarisiyyen d Iřaduġiyyen uca itwabđa řęaci, <sup>8</sup>minzi Iřaduġiyyen qqaren belli war teġi ca d tanukra nię d lmalakat uřa d buħbeř, maca Ifarisiyyen ceħden x man aya s tñayen. <sup>9</sup>Bdan syuyyun aťťas u ca n imseřmaden n idlisen zeg wezyen n Ifarisiyyen kKaren, ttemnaqacen s jjeħd, qqaren “War nufi uřa d ij n řęar di bñadem-a.

Mařa issiweř akis ij n buħbeř niy ij n lmalak, ejj aneř war nettmenyi x Arebbi.”<sup>10</sup>Umi ikkar ij n uxarweđ ameqqran, iggwed ukumandar ad mezzqen Bulus, xenni yumur ieeskariyyen ad d hwan maħend ad t xeđfen zi řwest nsen, ad t awyen řar lqecla.<sup>11</sup>Di ĝiřet awarni as ibedd-d xas Sidi, inna as “Egg uř, a Bulus, minzi am mammec xafi tceheded di Urcalim ammu ittxeřř ad tceheded uřa di Ruma.”

### ***Taxceft n Wudayen ĥima ad nyen Bulus***

<sup>12</sup>Ařami d iřbeħ řħař, ggın ca n Wudayen ict n texceft, qqnen ixef nsen s ict n nneēřet maħend war ttetten war sessen ař d nyen Bulus.<sup>13</sup>Tuřa inni ijuĝen, aqqa-ten ktar zi arebein.<sup>14</sup>Ina ruřen řar arruyas n ikeħhanen d imyaren n *weyduđ*, nnan “Aqqa neneqq ixef nney s ict n nneēřet maħend war nettett walu ař i řa nenney Bulus.<sup>15</sup>Xenni, kenniw d lmeħkama tameqqrant n Wudayen, xebbarem akumandar ad t-id řarwem indeħ tiwecca axmi texsem ad txebbcem di tmesřact-a mliħ. Aqqa neccin newjed ĥima ad t nenney qbeř mma ad řarek-d yaweđ.<sup>16</sup>Maca mmis n wečmas n Bulus isřa x texceft-a, iruħ din, yudeř řar lqecla uca ixebbar Bulus x man aya.<sup>17</sup>Iřařa Bulus i ijjen zeg iqebťanen x meyya, inna as “Ruħ s ubřiy-a řar ukumandar minzi řares ca ad as t yini.”<sup>18</sup>Iksi t uca iwyi t řar ukumandar, inna “Bulus, ameħbus, iřařa ayi-d, ittar ad ac awyeř abřiy-a i řar iĝa ca ad ac t ini.”<sup>19</sup>Iťteř it ukumandar s uřus, iddur zzayes weħdes uca isseřsa t “Min řarek ad ayi t tinid?”<sup>20</sup>Netta inna as “Aqqa Udayen kksen awař řarasen ĥima ad zzayek ttaren maħend ad d tessewid Bulus tiwecca řar lmeħkama tameqqrant n *Wudayen* axmi xsen ad t sseřsan ead.<sup>21</sup>Maca war ten ttiqqi, minzi ktar zi arebein n yeryazen zzaysen ggın as taxceft, qqnen ixef nsen s ict n nneēřet maħend war ttetten war sessen ař t nyen. Aqqa nitni wejden řexxu, ttrařan ad tewced ttesriħ nnek.”<sup>22</sup>Akumandar ija abřiy ad irah, inna as “War qqar i ĥed, aqqa tessareĝbed ayi x man aya.”

### ***Bulus řar Qayřariya***

<sup>23</sup>Xenni iřařa-d řares x tnayen n iqebťanen x meyya, inna “Sewjdem mitayn n ieeskariyyen maħend ad rařen řar Qayřariya řar třata n ĝiřet, akisen sebein n yinni inyın x yiysan d mitayn s řřitcat.<sup>24</sup>Ejj iten ad ssewjdem zwayeř maħend ad xasen sřymen Bulus ad t nedhen

ɣar læmil Filiks.”<sup>25</sup>Xenni yura ict n tebrat, iqqar dayes<sup>26</sup>“Kludiyus  
 Lisiyas, sřam x læmil yueřan Filiks.<sup>27</sup>Umi tťfen Wudayen aryaz-a  
 uca tuřa gguren ad t nřen, aqqa kkareř ak-d ict n terbiet n řeskar  
 uca fekkey t umi sřiy aqqa-t d Arumani.<sup>28</sup>Tuřa xsey ad ssney min  
 xef t đerřen uca iwyey t ɣar lmeřkama tameqqrant n Wudayen.  
<sup>29</sup>Ufiř aqqa đerřen t di ssibbet n ca n tmesřayin n ‘ttawrat’ nsen,  
 maca war din ufiř ađřam i isdaheřen řmewt niř iceddiyyen.<sup>30</sup>Xenni  
 umi d ayi itwana, belli ca zeg Wudayen ggin as taxceft, ssekkey t-id  
 řexdenni ɣarek, umureř i inni t iđerřen mařen ad ac inin zzatec  
 mi xef t đerřen. S ttisir”<sup>31</sup>Ieskariyyen ksin Bulus am mammec d  
 asen yumur uca iwyen t s ĝiřet ɣar Antibatris<sup>32</sup>uca tiwecca nnes  
 eqben ɣar lqeccla, jjin ad t-id awyen ssenni inni inyin x yiysan.<sup>33</sup>Umi  
 iwđen ina ɣar Qayřariya, wcin tabrat i læmil uca ssbedden Bulus  
 zzates.<sup>34</sup>Awarni řami iřra læmil tabrat nni isseqsa x man jjiřet i zi  
 d yusa netta uca yufa belli netta yusi-d zi Kilikiya.<sup>35</sup>Inna “Ad ac sřey  
 mařa uřa d yinni i cek iđerřen iwđen-d da.” Xenni yumur ad xas  
 essen di taddart n ccrae n Hirudus.

### *Bulus zzat i læmil Filiks*

**24**<sup>1</sup>Awarni xemsa n wussan ihwa Ananiyas, azeřif n ikehhanen,  
 ak-d imřaren n weydud d ij n lmuhami, qqaren as Tartulus,  
 uca usin-d zzat i læmil đidd i Bulus.<sup>2</sup>Umi xas-d řayan, ibda  
 Tartulus ideřen it, inna<sup>3</sup>“A sidi Filiks yueřan, aqqa zzayek ɣarney  
 řehna yuřen uřa d ssiyasa nnek aqqa tiwi-d aťas n řxar i řgens-a.  
 Aqqa neqbeř it s marra aqadi di kuř ayeřdis u di kuř amcan.<sup>4</sup>Maca  
 řima war cek hekkweřey aťas, ttettareř zzayek, ad aney tesřid  
 deřya cwayt s řxađar nnek.<sup>5</sup>Minzi nufa belli bnađem-a aqqa-t d ij n  
 řehřac, ittsebbab ayuwweř jar marra Udayen di ddunnit qaε, netta  
 d azeřif amezwaru n tebridt n Inařiriyyen.<sup>6</sup>Netta tuřa yarezzu  
 εawed mařen ad issexmej taddart iqeddsen, xenni neťtef it εawed  
 uca tuřa nexs ad xas neřkem s ttawrat nney.<sup>7</sup>Maca akumandar  
 Lisiyas yusi-d di řwest s uhettek aťas, iksi t jar ifassen nney.<sup>8</sup>Netta  
 yumur mařen inni ixsen ad t đerřen, ad ɣarek-d asen. Mařa t  
 tesseqsid, ad tfehmed s yixef nnek marra mi xef t neđřen.”<sup>9</sup>Uca  
 εawed Udayen usin-d akides, nnan belli marra man aya ammu i ięa.  
<sup>10</sup>Maca Bulus, umi d as iceyyar læmil mařen ad issiweř, yarr-d

“Nec ssney belli cek d řqađi x řgens-a ařtas n iseggwusa, x uyenni ad dafæey s yixef inu s teryast ktar. <sup>11</sup>Cek tzemmed ad tessned, aqqa εdun mýir tenεac n wussan waha zeg wami gaεdey řima ad εebdey di Urcalim. <sup>12</sup>Nitni war d ayi ufin di taddart iqeddsen ttemnaqacey ak-d ca n ijjen niý ssnekkarey aýuwwey jar řgens uřa deg isinagugen niý di tendint. <sup>13</sup>Nitni war zemmeden ad ssbiyyinen min zi d ayi đerřen řexxu. <sup>14</sup>Maca man aya ad ac neemey, belli εebbdey Arebbi n řejdud *nney* x řehsab n ‘tebridt’ umi qqaren nitni ‘tabridt ifayren’, am ttamney di marra min yurin di ttawrat u deg imkacafen. <sup>15</sup>Aqqa dayi asitem di Arebbi, am uřa d nitni ttarjan tt εawed, aqqa ad din tiři tnukra n imettinen, *tanukra* n imseggaden u *tanukra* n yinni war ięin d imseggaden. <sup>16</sup>Ammu uřa d necc tteggey tizemmar deg ixef inu řima ad řari tiři řebda tnefsect teřfa zzat i Arebbi u zzat i iwdan. <sup>17</sup>Awarni ařtas n iseggwusa usiy-d mařend ad awyey řřdaqi i řgens inu d tiyarřin. <sup>18</sup>Aqqa ufin ayi ca n Wudayen zi Asiya am tuýa ceýřey ak-d man aya, awarni řami twassizdegey di taddart iqeddsen uca war din řari řýaci uřa d axarweđ. <sup>19</sup>Ittxeřř asen i nitni *inni ięan d Udayen zi Asiya* ad řđaren da zzatek mařend ad ayi đerřen mařa řarsen ca xafi. <sup>20</sup>Niy ad inin ina *i da ibedden* man řeib i dayi ufin umi beddey zzat i lmeřkama tameqqrant n Wudayen, <sup>21</sup>mýir awař-a i tuýa t řayiy umi beddey jarasen ‘Ass-a twařekmey zwayem di ssibbet n tnukra n imettinen.’ ”

<sup>22</sup>Umi isřa Filiks aya, issbedd asen řehkam, inna “Xmi i d ya ihwa ukumandar Lisiyas, ad řekmey di tmesřayin nwem.” <sup>23</sup>Xenni yumur i řqebřan x meyya řima ad iřđa Bulus maca s cwayt n lřurriya ktar u war imennee uřa d ijj zeg inni ięan nnes ad xas sexxaren niý ad řares-d asen. <sup>24</sup>Xenni awarni ca n wussan, umi d yusa Filiks ak-d Drusilla tamýart nnes i ięan d Tudact, iřaya-d i Bulus uca isřa zzayes x liman di Lmasiř. <sup>25</sup>Ařami yiweđ řřard x tsegda d đđebř n nnefs u x lřisab, iggwed Filiks uca yarr-d xas “Ruř řexxu! Xmi řari i řa yiři řweqt, ad ac-d řayiy.” <sup>26</sup>Netta tuýa issitim εawed mařend Bulus ad as iwc tmenyat, řima ad as iđřeq. X uyenni tuýa xas-d iřaya ařtas n twařawin řima ad kis issiweř. <sup>27</sup>Maca umi kemmřen tnayen n iseggwusa, yareřřeb Filiks s Burkiyus Fastus wenni t i řa ixerřen. Umi tuýa Filiks ixš ad yarđa Udayen, ija Bulus di snaseř *di řehbes*.

*Bulus zzat i Fastus*

**25** <sup>1</sup>Ařami d yiweđ Fastus ęar weqlim, iruĥ ęar Urcalim zi Qayřariya awarni řami edun třata n wussan. <sup>2</sup>Uca azeęif n ikehhanen d imcenneen n Wudayen ssaregben t x min xef đerĥmen Bulus uca heccmen t <sup>3</sup>am zzayes ttaren maĥend ad iwc ttesriĥ đidd nnes, ĥima ad t indeĥ ęar Urcalim maĥend nitni ad as ssewjden ict n texceft maĥend ad t nyen deg webrid. <sup>4</sup>Maca Fastus yarr-d, maĥend ad iqqim Bulus itwaĥđa di Qayřariya u netta simant nnes igga ad din irah deęya. <sup>5</sup>Inna “Ad raĥen akidi inni i ęar ięa ccan jarawem, ad t đerĥmen mařa din ca n řeib deg weryaz-a.” <sup>6</sup>Umi ęarsen iqqim ktar zi eecra n wussan ihwa ęar Qayřariya u tiwecca nnes iqqim x řkursi n řĥukm uca yumur ad d awyen Bulus. <sup>7</sup>Umi d yiweđ, nneđen xas Wudayen inni tuęa d ihwan zi Urcalim uca ggin ařas n icetciten iđeęřen x Bulus, war zemmaren ad tent ssbeynen. <sup>8</sup>Netta iwta x yixef nnes *ammu* “Necc war xđiy ca di ttawrat n Wudayen nię di taddart iqeddsen uřa di qayřar.” <sup>9</sup>Umi yarezzu Fastus ad igg řxađar i Wudayen, isseqsa Bulus “Ma tessed ad tgaeded ęar Urcalim, ĥima ad din twaĥekmed zzati di ssibbet n tmesřayin-a?” <sup>10</sup>Bulus inna “Necc aqqa beddeę zzat i řkursi n řĥukm n qayřar mani ittxeřř ad xafi itwaĥkem. War xđiy deg Wudayen s walu am mammec cek tessned mliĥ. <sup>11</sup>Minzi mařa xđiy nię mařa ggię min isdaheęen řmewt, war tteekksey x řmewt. Maca mařa war din bu tidett nican i zi d ayi đerĥmen nitni, xenni war izemmar uřa d ijjen ad ayi isellem i yina. Necc ssgaedeę ddeewet inu ęar qayřar.” <sup>12</sup>Awarni řami tuęa imcawar ak-d wagraw, yarr-d Fastus “Aqqa tessgaeded ddeewet nnek ęar qayřar, xenni ęar qayřar i ęa traĥed.”

*Tawasit n ujeęid Ayribas ęar Qayřariya*

<sup>13</sup>Umi edun ca n wussan yusi-d ujeęid Ayribas d wečmas Barniki ęar Qayřariya ĥima ad seęmen x Fastus. <sup>14</sup>Awarni řami nitni sseedun din ařas n wussan icawed Fastus i ujeęid tamesřact n Bulus, inna “Aqqa da ij n weryaz wenni da ijja Filiks d amehbus. <sup>15</sup>Řami dayi tuęa di Urcalim, đerĥmen t arruyas n ikehhanen d imęaren n Wudayen, arezzun ad itwaĥakem. <sup>16</sup>Necc arriy-d xasen belli Irumaniyyen war nnumin ad sellmen ij n bnadem i uhellek ĥima ad arđan iwdan.

Ittxešš ad ḥḍaren zzates inni t iḍeřmen uca ad ęares tiři ttasie maḥend ad idafee x yixef nnes zi jjihet n ttuhmet. <sup>17</sup>Umi da d iwḍen jmie, war eęizey uca tiwecca nnes qqimey x řkursi n řḥukm uca umurey ad d awyen aryaz nni. <sup>18</sup>Umi d as-d nneḍen inni t iḍeřmen, war d iwyen uřa d ict n ttuhmet i tuya nwiy. <sup>19</sup>Maca tuya ęarsen xas ca n tmesřayin zi jjihet n dđin nsen x ijjen qqaren as Yeccu wenni aqqa immut, wenni i xef tuya Bulus iqqar belli aqqa iddar. <sup>20</sup>Am tuya cekkey di tmesřact-a i di tuya arzuę, sseęsiy necc, ma zeema netta ixs ad irah ęar Urcalim ḥima ad itwaḥakem din x tmesřayin-a. <sup>21</sup>Umi issęaeęed Bulus ddeęwet nnes ḥima ad t ḥḍan ař xas iḥkem qayřar, xenni umurey ad t ḥḍan ař t i ęa ssekkey ęar qayřar.” <sup>22</sup>Inna Aęribas i Fastus “Uřa d necc xsey ad sřeę i bnađem-a.” Inna as “Tiwecca ad as tesřed.”

<sup>23</sup>Tiwecca nnes umi d yusa Aęribas d Barniki s marra ccan uca udfen ęar wexxam n řḥukm ak-d ikumandaren n řęeskar d yeryazen icennęen n tendint, xenni yumur Fastus ad t-id awyen. <sup>24</sup>Inna Fastus “A ajeęid Aęribas u kenniw marra iryazen i da iḥḍaren akidney, aqqa teęrim wa, wenni min xef d ayi issiweř marra řęaci n Wudayen di Urcalim uřa danita, sęuyyun maḥend war ittyimi ad iddar ead. <sup>25</sup>Maca necc, umi ufiy belli war iggi min isdaheęen řmewt u minzi netta issęaeęed ddeęwet nnes ęar qayřar, ggıy ad t ssekkey din. <sup>26</sup>Maca war ęari bu tmesřact nican ssney t zi jjihet nnes ḥima ad tt ariy i sidi. X uyenni sseḥḍarey t-id i kenniw, d amezwaru i cek, a ajeęid Aęribas, ḥima, awarni xmi i ęa nkemmeř tarezzut, ad ęari tiři min i ęa ariy, <sup>27</sup>minzi ittyiř ayi aqqa war icuwwar xmi i d ęa ssekkey ij n umehbus nnebřa mma ad ssbeyyeneę ttuham i xas gęin.”

### ***Bulus ittdafae x yixef nnes zzat i ujeęid Aęribas***

**26** <sup>1</sup>Inna Aęribas i Bulus “Cek ęarek ttesriḥ ḥima ad tessiwřed x yixef nekk.” Xenni isswizzed Bulus afus nnes uca iwta x yixef nnes, *inna* <sup>2</sup>“Nec aqqa-yi di řxaḍar inu, a ajeęid Aęribas, am zemmarey ad wtey x yixef inu ass-a qibač nnek x marra x min xef dayi ḍeřmen Wudayen. <sup>3</sup>Deg umezwaru s minzi aqqa cek tessned marra tṭbayeę d tmesřayin i ięan jar Wudayen. X uyenni ttarey zayek ad ayi tesřed s ttasie n řxaḍar. <sup>4</sup>Tudart inu zi temęi tenni tuya ḍdarey zeg umezwar jar řęens inu u di Urcalim, ssnen tt marra

Udayen. <sup>5</sup>Nitni ssnen ayi aţtas zeg wami, mařa xsen ad ceħden x man aya waha, aqqa necc tuya đeffarey tabridt iqeřen ktar zi dđin nney, aqqa ddarey d Afarisi. <sup>6</sup>U řexxu necc beddey u twařakamey di řtwee n usitem n řwaed i d yusin zi Arebbi řar řejdud nney, <sup>7</sup>asitem wenni ttrajant ad řares-d awđent teneac n tqebbař n *Israyil*, am eebbđent i Arebbi řiřet d wass. Di řtwee n usitem-a, a ajeřid Ayribas, đeřmen ayi Wudayen. <sup>8</sup>Mayemmi d awem ittyiř war izemmar ad namen umi Arebbi issnekkar-d imettinen? <sup>9</sup>Necc simant inu tuya ittyiř ayi nican, belli ittxeřř ad ggey aţtas n tmesřayin đidd i yisem n Yeccu Nnařiri <sup>10</sup>uca aya i ggiy eawed di Urcalim. Am řřfey tizemmar zi jjiħet n arruyas n ikeħhanen, řebbsey aţtas n imqeddasen. Uca umi tuya gguren ad twanyen, wciy afus inu di man aya. <sup>11</sup>Edebey ten aţtas n twařawin di marra isinagugen maħend ad ceqqfen *deg webrid nsen* u xmi tuya xasen tthajey aţtas, tuya ttazzřey xasen řar tneddam i iřan barra i tmurt. <sup>12</sup>X uyenni tuya ggurey řar Dimacq eawed s ttesriħ d řumur zi jjiħet n arruyas n ikeħhanen. <sup>13</sup>Xenni, a ajeřid, zriy di řweřt n webrid ict n tfawt zeg ujenna, tettissiqq ktar zi tfuct, tenneđ ayi-d u i yinni akidi imsafaren. <sup>14</sup>Umi newđa marra řar tmurt, sři y ict n tmijja tessawař akidi, teqqar s tcibranit (=řřard n *Wudayen*) ‘Cawul, Cawul, mayemmi d ayi tdarrced? Iqseř xak ad tsefsed x tyarsa.’ <sup>15</sup>Nniy as ‘Min teđnid cek, a Sidi?’ Inna ayi ‘Necc d Yeccu wenni tmarrted. <sup>16</sup>Maca kkar, tbedded x iđaren nnek, minzi i uya i d ac-d đharey ħima ad cek ixđarey d amsexxar d aceħhad x min tezřid u x min d ac i řa sseđharey ead, <sup>17</sup>am fekkey cek zeg weydud-a u zi řegnus i řar cek i řa ssekke y, <sup>18</sup>ħima ad tarezmđ tiřawin nsen ħima ad tuben zi tağest řar tfawt u zi řřulřa n Cciřan řar Arebbi ħima ad řřfen a yřar n dđnub u ict n tesyart n řwart řar inni itwaqeddsen s liman dayi.’

<sup>19</sup>X uyenni, a ajeřid Ayribas, war ři y war řřisey i řewři y i zriy zeg ujenna, <sup>20</sup>maca řar umezwar bđiy ad barrřey i inni iřan di Dimacq d Urcalim d marra jwayeh n Yahudiyya u i řegnus ħima ad tuben ad dewřen řar Arebbi, ad ggen řexdayem i ittriřen i ttubet. <sup>21</sup>X uyenni řřfen ayi Wudayen di taddart iqeddsen uca xsen ad ayi nyen. <sup>22</sup>Xenni, am d ayi iwca Arebbi afus, beddey ztat i umezyan d umeqqran ař ass-a, war qqarey walu myiř min zi ssiwřen imkacafen uřa d Musa aqqa ad yiři, <sup>23</sup>belli tuya ittxeřř i Lmasiħ ad iweddeb

uca, am iġa netta d amezwaru i d ikkaren zeg imettinen, ad ibarreh s tfawt i weydud-a u i řegnus *marra*.”

<sup>24</sup>Ařami yiweđ deg udafee nnes řar man aya, inna Fastus s jjeħd “Aqqa txerřed, a Bulus. Ařřas n tyuri tessbuhři i cek.” <sup>25</sup>Maca netta inna as “Necċ war twaxerřey ca, a *sidi* Fastus yueřan, aqqa qqarey ac t nican s tidett u s řeeqerř, <sup>26</sup>minzi ajeġid issen mliř x tmesřayin-a. X uyenni ssawařey s teryast minzi war uminey belli uřa d ict n řřahjet zi tmesřayin-a aqqa tennuffar xas, minzi marra man aya war imsar deg ict n jjiħet *waha*. <sup>27</sup>Ma tumned zeg imkacafen, a ajeġid Ařribas? Necċ ssney belli tumned zzaysen.” <sup>28</sup>Maca Ařribas inna i Bulus “S drus textsed ad ayi tessqeneed řima ad dewřey d Amasiři.” <sup>29</sup>Inna as Bulus “Ttarey Arebbi belli deyya u i wařřas, maci cek *waha* maca uřa d marra inni d ayi ittesřan ass-a, ad dewřen am necċ, maca nnebřa iceddiyyen-a.” <sup>30</sup>Umi inna aya, ikkar ujeġid d læmil d Barniki d yinni tuya akisen iqqimen. <sup>31</sup>Xenni ruřen nitni řar uyezdis, ssawařen ak-d wayawya, nnan “Aryaz-a war iggi ca min isdaheġen řmewt uřa d iceddiyyen.” <sup>32</sup>Inna Ařribas i Fastus “Maelik war tuyi issgaeeed ddeewet nnes řar qayřar, iři aqqa itwadřeq bnamem-a.”

### ***Bulus ittšafar řar Ruma***

**27** <sup>1</sup>Ařami negga ad nuyur di řebřar řar Iřalya, sellmen Bulus d ca n imeřbas nneđni i ij n řqebřan x meyya qqaren as Yuliyus, tuya-t zeg ubařayun n *qayřar* Uřustus. <sup>2</sup>Nenya deg ij n uřarrabu zi Adramitijum, tuya iggur ad ikk x jwayeh i iġan řar tma n Asiya, uca nruħ. Tuya akidney Aristarxus, ij n weryaz zi Tisaluniki di Masiduniya. <sup>3</sup>Tiwecca nnes niweđ řar Sidun. Yuliyus wenni tuya iġan mliř ak-d Bulus, isamħ as ad irah řar imeddukař nnes řima ad xas sexxaren. <sup>4</sup>Umi neffey ssenni, nbeřřar deg uđuři n Qubrus, minzi asemmiđ tuya iccat dayney deg uęembub. <sup>5</sup>Awarni řami neřwa řebřar ztat i Kilikiya d Bamfiliya, niweđ řar Mira di Lukiya. <sup>6</sup>Řqebřan x meyya, řami yufa din ij n uřarrabu zi Iskandariya ittrař řar Iřalya, issenya aney dayes. <sup>7</sup>Ařřas n wussan nbeřřar myir cwayt cwayt uca niweđ s řeeqerř d uyiř řar Knidus, minzi war d aney yeji usemmiđ ad nrař řar ztat, xenni nbeřřar deg uđuři n Krita ztat i Salmun. <sup>8</sup>Umi t neřwa s uyiř, niweđ řar ij n wemcan umi qqaren

‘řmuyyat tišebħanin’ tenni tťarf i tendint n Lasiyya. <sup>9</sup>Umi yeedu aťtas n řweqt, xenni idweř usafar di řebħar yewear, tuća eawed aźummi iedu uca iřem asen Bulus, <sup>10</sup>inna asen “A iryazen, necc ttwariř asafar ad yawi drucl d txessart aťtas maci myir i sseřet d uřarrabu waha, maca uřa i tudart nney.” <sup>11</sup>Maca řqebťan x meyya tuća ittiqq ktar deg ibeħriyyen d bab nnes zi min itwannan zi Bulus. <sup>12</sup>Umi tuća amcan n řmuyyi war iħři ħima ad sseedun řmecta din, ibedd array n wezyen ameqqran nsen ad ffyen ssenni, balak ad awďen řar Finiks, ij n řmuyyi di Krita, iwařan ljanub n řřarb d ccamal n sennej n řřarb, ħima ad din sseedun řmecta.

### Taħaryat

<sup>13</sup>Umi isaha usemmiď n ljanub, ittyř asen ufin min arezzun uca ssgaeden ayřizim, bdan ttcuqqan tťarf n tma n Krita s uřarrabu n řbacc nsen. <sup>14</sup>Maca cwayt awarni man aya tekkar thaj tťaryat n usemmiď d tameqqrant, qqaren as Uruklidyun (=asemmiď i d yusin zi ccamal). <sup>15</sup>Ařarrabu itwaksi zzayes, war izemmar i usemmiď, xenni nestewťe uca netwandeh. <sup>16</sup>Am nekka deg udduři n ict n tegzirt d tamezyant umi qqaren Kludi, s uřyř i nemnee đman n tyarrabut n usellek i iřan řar đeffar n uřarrabu. <sup>17</sup>Awarni řami tt ssgaeden, bdan ssheddamen iseywan, beysen i uřarrabu, tuća ggweden ad mmenďaren di Sirtis, s uyenni ssehwan-d řbacc uca twanedhen zeg usemmiď. <sup>18</sup>Am netwaearren s tťaryat zi ssa řar diha, xenni tiwecca nnes bdan netťaren đďqeř di řebħar <sup>19</sup>uca deg wass wiss třata nenďar řeqcœ n uřarrabu s ifassen nney. <sup>20</sup>Aťtas n wussan war tbin tfucl uřa d itran uca taħaryat teħřar aney war teři drust, xenni neqďee marra řayas zeg usenjem.

<sup>21</sup>Řami kkin aťtas war ccin, ibedd Bulus di řwest nsen, inna “A iryazen, tuća ittxeř awem ad řari tesřem, war tteffym zi Krita, xenni war d aney třeqqef drucl-a d txessart-a. <sup>22</sup>Maca eawed řexxu, ad kenniw cejjey, minzi uřa d ijj zzaywem war ittweddari ca tudart nnes, myir ařarrabu waha ad iyebbař. <sup>23</sup>Minzi ibedd-d řari řiřet-a ij n lmalak n Arebbi wenni necc nnes u netta d wenni eebbdeř. <sup>24</sup>Inna ayi ‘War tteggwed ca, a Bulus, minzi ittxeř ac ad tbedded qibač i qayřar. Xřar, marra inni akis ittbeħħaren, aqqa iwc ac ten Arebbi.’ <sup>25</sup>X uya ggem taryast, a iryazen, minzi ttiqqeř di Arebbi, belli ad tteffey

ammu, am mammec d ayi inna. <sup>26</sup>Maca s uyiř ittxeřř ad nennay deg ict n tegzirt.” <sup>27</sup>Umi tuya ĝiřet wiss arbeetac i di netwaearen zi ssa ęar diha di řebęar n Adriyana, di řweř n ĝiřet ittyiř asen i ibeęriyyen, aqqa nęarreb ęar řbarr. <sup>28</sup>Umi nęaren řiru n řexfiř di raęay n řebęar, eebbaren eicrin n tiddiwin (=řqedd n ij n bnađem i issizwiden ifassen nnes sennej i uzeęif nnes, aqqa-t eřaęař 1,8 mitru). Umi eđun cwayt, nęaren řiru tawařa nneđni uca ufin xemstac n tiddiwin. <sup>29</sup>Am ggweden ad řeqfen imucan n sseęaę, nęaren arebea n iyřizam zi đeffar n uęarrabu uca ttaren ad yaweđ uziř. <sup>30</sup>Řami tuya ibeęriyyen xsen ad arewřen zeg uęarrabu, sęęaren taęarrabut n usellek ęar řebęar axmi xsen ad nęaren iyřizam ęar zzat n uęarrabu, <sup>31</sup>inna Bulus i řqebęan x meyya u i ięeskariyyen “Mařa ina war qqimen deg uęarrabu, war tzemmarem ad twasnejem.” <sup>32</sup>Xenni qeřřen ięeskariyyen iseywan n tęarrabut n usellek uca jjin tt ad tewđa. <sup>33</sup>Ařami d iqarreb ad iřbeę řęař, iziyyar iten Bulus marra ģima ad ccen, inna “Arbeetac n wussan aqqa teqqimem nnebřa macca, war teccim walu. <sup>34</sup>X uyenni cejjeey kenniw ad teccem minzi man aya ad kenniw infee i usenjem nwem, minzi war iwetęi uřa d ij n uzeętu n ucuwwaf n uzeęif n ca n iijen zzaywem.” <sup>35</sup>Umi inna aya, iksi aęrum, icekkar Arebbi qibač i iwdan, yarza it, ibda ad icc. <sup>36</sup>Dewřen marra arecęen, ksin eawed macca. <sup>37</sup>Tuya deg uęarrabu mitayn u setta u sebein n yeryazen. <sup>38</sup>Řami jjiwnen s macca, bđan ssefsasen aęarrabu, nęaren irden di řebęar. <sup>39</sup>Ařami iřbeę řęař, tuya war ssinen tamurt nni, maca zřin ij n umesruq n řebęar ęares tma twaęa uca mcawaren, ma nzemmar ad din nearen aęarrabu. <sup>40</sup>Umi qeđwen iyřizam, jjin ten di řebęar, fesyen iccedan n řemqadeř, ssgaeęden řbacc n zzat i usemmiđ ittęuđen, wejjhen ęar tma n řbarr. <sup>41</sup>Maca aęarrabu iwta ij n uearrec n yijdi mani ięa řebęar ęar tnayen n iyezdisen uca nnuęen s uęarrabu. Zzat n uęarrabu idweř war izemmar ad inhezz, maca đeffar n uęarrabu yarrez s jjeđ n řemwaj. <sup>42</sup>Tuya newwan ięeskariyyen ad nyen imeębas ģima war itteummi đeđ maęend ad yarweř. <sup>43</sup>Maca řqebęan x meyya wenni tuya ixs ad issenjem Bulus, issbedd iten, yumur belli inni izemmaren ad eummen ad nęaren ixef nsen d amezwaru maęend ad awđen ęar řbarr, <sup>44</sup>uca awarni man aya, wi iqqimen, ca zzaysen x tferwin u ca zzaysen x izeynan n ikeccuđen n uęarrabu. Uca ammu imsar, aqqa marra iwđen twasnejem ęar řbarr.

### *Bulus di tegzirt n Malta*

**28** <sup>1</sup>Umi nejmen, ssenni fehmen, belli tagzirt nni qqaren as Malta. <sup>2</sup>Ayt n tmurt (*inni umi qqaren 'barbarus' niy 'ibarbariyyen', minzi nitni war ġin ca d Iyunaniyyen*) ggin akidney mliħ aṭṭas, am nitni ssiyen ict n timessi tameqqrant uca iwyyen aney akidsen ħar daxeř ħarsen minzi anħar tuħa ibda iccat u minzi tuħa tesmed. <sup>3</sup>Ařami tuħa Bulus issmun aṭṭas n icekwađ, issars iten x uceeeř n *tmessi*, xenni s řeħmu nni iffey-d ij n ufiħar uca inned as i ufus. <sup>4</sup>Umi řrin ayt n tmurt řweħc nni inned as i ufus nnes, nnan ak-d wayawya "Bnadem-a d aqettař, war t iiji 'řheq' ad iddar waxxa injem-d zi řebħar." <sup>5</sup>Maca netta izzerez řweħc di *tmessi*, nnebřa mma d as temsar uřa d ict n druct. <sup>6</sup>Maca nitni tuħa ttarjan ad yuff niy ad iwđa ad immet řexdenni. Maca umi řrin, awarni řami rajan aṭṭas, belli war d as temsar uřa d ict n řħajet, ibeddeř array nsen, nnan, aqqa-t d ij n arebbi. <sup>7</sup>Tuħa x ĵijhet n wemcan nni iħwicen n umcennee amezwaru n tegzirt nni umi qqaren Publijus, wenni i tuħa yareħħben zzayney uca issnewju aney s řħar třata n wussan. <sup>8</sup>Xenni aqqa babas n Bublikus tuħa izzere, dayes timessi d teqqrint. Yudef Bulus ħares, izzuđ, issars xas ifassen uca issgenfa t. <sup>9</sup>Umi imsar man aya, usin-d ħares innedni n tegzirt inni tuħa ħar iġa imeħřac uca twassgenfan. <sup>10</sup>Karmen xaney ina s waṭṭas n ccen. Umi nruħ nbeħħar, wcin aney min tuħa neħwaj.

### *Bulus ittekkwađ ħar Ruma*

<sup>11</sup>Awarni teřt n iyuren nbeħħar deg ij n uħarrabu zi Iskandariya i isseedu řmecta di tegzirt, tuħa xas ij n arcam n 'Tecniwin' (= 'Tecniwin' nitni d itran qqaren as Kastur d Pulluks, tarwa n iijen zi lařnam n Iyunaniyyen, qqaren as Zayus). <sup>12</sup>Umi niweđ ħar Siragusa, neqqim din třata n wussan. <sup>13</sup>Ssenni ndur uca niweđ ħar Rixiyum. Awarni iij n wass ikkar-d usemmiđ n tcarmin uca niweđ deg wass wiss tnayen ħar Putiyuli, <sup>14</sup>mani nufa tawmat. Nitni ttaren zzayney ad kidsen neqqim sebea n wussan. Ammu i niweđ ħar Ruma. <sup>15</sup>Uca tawmat di Ruma inni isřin x umeddur nney, usin-d ħima ad kiney mmeřqan di 'Apijus Furum' u ħar 'Třata n Tħuna'. Umi ten izra Bulus, icekkar Arebbi uca itwacejje. <sup>16</sup>Umi d nusa ħar Ruma, isellem řqebħan x meyya imeħbas i ukumandar n řeskar, maca isamħ as i Bulus ad izdey weħdes ak-d ueessas wenni t iħeřtan.

***Ameřqi n Bulus ak-d Wudayen di Ruma***

<sup>17</sup>Awarni třata n wussan iřaya Bulus i imcennæen n Wudayen. Ařami munen, inna asen “A iryazen tawmat, waxxa necc war ggiy uřa d ict n řřajet řidd i weydud niy řidd i řřbayeæ n řejdud nney, aqqa twasellmey d amehbus zi Urcalim deg ifassen n Irumaniiyyen. <sup>18</sup>Awarni řami d ayi beqqcen, tuya xsen ad ayi arxun minzi war dayi ufin uřa d ict n řřajet tessdaheğ řmewt. <sup>19</sup>Maca umi æekksen Wudayen man aya, ittyiř ayi belli ad ssgaædey ddeewet inu yar qayřar, maca nnebřa mma ad yari yiři ca řidd n řgens inu. <sup>20</sup>X ssibbet-a ttarey řima ad kenniw zarey uca ad kiwem ssiwřey. Minzi di ssibbet n usitem n Israyil, necc aqqa-yi carfey s snesřet-a.” <sup>21</sup>Maca nitni nnan as “War xak neřřif ca tibratin zi Yahudiyya uca uřa d ijj n tawmat war d yusi da i innan niy issiwřen xak s ca n řeib. <sup>22</sup>Maca neccin nexs ad zzayek nseř min tettwařid, minzi zi jjihet n tebridt-a, aqqa nessen belli tteekksen tt mani mma.” <sup>23</sup>Awarni řami kis ggim ij n wass, usin-d yares ařřas zzaysen yar taddart nnes, tuya ittressar asen tageldit n Arebbi, yarezzu ad ten isseqneæ zi ttawrat n Musa u zeg imkacafen zi jjihet n Yeccu zi řefjar ařami d tameddit. <sup>24</sup>Ca twassqenæen s min d asen inna, innedni ugin. <sup>25</sup>Am war d usin ak-d wayawya, mmsebdan, awarni řami inna Bulus ijj n wawař, aqqa d wanita “S řheqq issiweř Arruh Iqeddsen x uqemmum n Icaeya i řejdud nney, iqqar

*26*“Ruh yar aydud-a, ini: S usegi ad tesřem war ggur ad tfehmem, s tmuyři ad texzarem war ggur ad tettwařam, <sup>27</sup>minzi uř n weydud-a aqqa idweř d imuzzuren, imezzuyen nsen deqřen s usegi uca tiřřawin nsen qqent, mařend war ggur ad ttwařan s tiřřawin nsen, ad sřen s imezzuyen nsen, ad fehmen s wuř nsen řima ad tuben uca necc ad ten ssgenfiy.’ Ica. 6:9-10

<sup>28</sup>X uyenni ittxeřř ad tessnem mliř, belli asenjem n Arebbi aqqa itwassekk-d i řegnus u nitni ad yares sřen.” <sup>29</sup>Awarni řami inna man aya, ffyen Wudayen, am tuya ttemcubbucen jarasen ařřas. <sup>30</sup>Bulus iqqim tnayen n iseggwusa di taddart nnes tenni icra, tuya ittareřřab s marra inni tuya yares-d ittassen, <sup>31</sup>ittbarreř s tgeldit n Arebbi, isseřmad x Sidi Yeccu Lmasiř s marra taryast u nnebřa mma tetwassbedd uřa d ict n teenkrift.